

(31)  
sind.

L' OMU  
NUN AVI L' USU DI LA RAGIUNI

---

CICALATA

DI LU PROFESSURI

CAV. A. CATARA-LETTIERI



MESSINA  
TIPOGRAFIA D' AMICO  
—  
1869

ALL'EGREGIU CITTADINU

SIG.<sup>r</sup> VINCENZU CHEMI

---

Offrendu a Vui stu poviru  
scrittu miu, chi mandu alla  
stampa pri sodisfari lu desi-  
deriu di l'amici, speru chi Vui  
l'accettiriti cu dda stissa bona  
voluntà, chi vi fa essiri distintu  
patriotta, saggiu patri di famig-  
ghia ed amicu sinceru — Cun-  
tinuati lu vostru affettu a lu  
vostru amicu

A. CATARA-LETTIERI.

---

Un pensiero ho ruminato per parecchi anni in mente, quello cioè di offrire al pubblico un ragionamento sul tema: *L'uomo non ha l'uso della ragione*. Più io vi meditava, più vedeva l'attuazione doverne riuscir facile — più tempo iva scorrendo, nuovi materiali nel mio intelletto e da questo si riunivano. Se non che tante e sì svariate cagioni ognora mene allontanavano dalla esecuzione.

Quando pochi giorni addietro mi sentii punto da vergogna, comprendendo che lo svolgimento di tal tema, nel modo da me ideato, mirasse al bene dell'umano consorzio — adunque, senza metter più tempo in mezzo, mi feci a distenderlo in dialetto no-

strano, che giudicai più opportuno a colorire il mio disegno. Gli uditori imparziali, che mi onorano, ai quali è noto, il processo, il movimento attuale degli spiriti e delle umane associazioni, giudicheranno della santità del mio scopo, e se io fui da tanto a rispondere allo stesso.

Se taluni amici, a' quali lessi alcun brano del presente cicaleccio, non mi avessero incuorato colla loro non sospetta approvazione, io me ne sarei rimasto senza farne un motto (1).

Le mie armi son contro del vizio, dello errore, dell'arbitrio, sotto qualunque forma si presentino.

Dirò con Tommaso Campanella:

Io naequei a debellar tre mali estremi,  
Tirannide, sofismi, ipocrisia.

---

(1) Questo lavoro fu letto nei giorni 11 e 21 Febbraio in due tornate generali straordinario della R. Accademia Peloritana.

---

Infinito è il numero degli stolti.

*Nella S. Scrittura.*

1.

Iu sugnu piruccuni, mi tegnu strittu, attaccatu cu la Santa Scrittura. L'omini tutti presenti, passati e puru futuri mi parinu tanti foddi — lu dici la viritati ch' infinitu è lu numeru di li foddi. Oi si vanta lu progressu, la raggiuni, la civiltati, e chi sacciu ieu! ma iu puvireddu nun ci cridu un ficu — pri mia c'è senpri rigressu, disragiuni e pazzia.

Nun ci criditi?

Vi cumpatisciu, anchi ieu era foddu na vota — avia china la testa di sti paruluni, e mi paria già chi putia sfunnari lu celu cun pugu. Ma la scola di la esperienza, e lu studiu profunnu di li sapienti carti di tanti omini summi mi ficiru a la fini cunusciri la granui virità, chi l'omini nun annu l'usu di la raggiuni.

Bastiria la Santa Scrittura pri cunvinciri ognunu di la pazzia dill'omu, di la mancanza di raggiuni.

*Ma oggi mio caro Professore, mi sentu diri di na vuci 'mpurtuna, oggi mio caro Professore, non si pensa più come si pensava una volta — oggi si ha fede nel progresso, si crede alla ragione, ed i suoi detti sono oracoli.*

A quali ragioni vuliti ca ieu mi sottumenta? a chidda di li dotti, di li filosofi? o a chidda di l'umanità?

A mia pari, e vi lu mustru cu argomenti lampanti, comu quattru e quattru fannu ottu, chi li filosofi tutti insemmula, e l'omini tutti pari pari nun ànnu mai ragianatu.

## 2.

Percurru cu la menti tutti l'epuehi, tuttu lu munnu, orientali, grecu, rumanu, e Cristianu, e sempri erruri, sempri pazzia.

Nun vi vogghiu scunzari tantu, Signuri mei garbatissimi, ricurdanduvili tutti — basta dirivi chi lu granni Ciciruni a li so' tempi dici: *Nihil tam absurdum dici potest, quod non dicatur ab aliquo philosophorum.* Ora immaginativi vui chi s'avi pututu diri 'ntra nautri vinti seculi — Mirabilia!

Lassamu dunca in paci a Pitagura cu lu soi *ipse dixit*, natu crisciutu e pasciutu 'ntra setti anni di assolutu silenziu, a lu quali obbricava li so' seculari a stari muti, e a sintiri li so' lizioni a lu scuru, e a manciari erbi e ova, e a biviri acqua frisca — daunuci pri supratavula la musica e la giunastica. E 'ntra stu modu a lu filosofu di Samu ci paria chi avissi a riformari lu munnu, e cacciannu li tiranni, e distruggennu la mala simenza.

Lassamu puru a Platuni cu la so' bedda Repubblica, chi è na 'nzalatedda di tutti pititti — c'è robba cu la pala pri tutti — pri cu voli viviri a spisi d'autru, o spassarisi cu tutti li fimmini, o viviri senza liggi e senza Diu, ci trova lu so' spassu. La Repubblica di

Platuni è la vera cuccagna — no la cuccagna chi facia lu Re Ferdinandu Nasuni, quannu lu Diavulu ci mandava quarchi figghiu — ma na cuccagna di novu geniri — è lu spassu cu la robba d' autru, e cu la Veniri comuni ... basta.

Lassamu di parti ad Aristotili, lu filosofu di Stagira, cu la so' schiavitù naturali!

St' autru affruntu ci vulia a la povira umanitati! Chi bedda cosa chi rigalau a lu munnu stu filosofuni — divisi lu geniri umanu in dui parti, in patruni e servi. Cu pri casu avi na schizza di midudda di chiui, è patruni; ddu svinturatu chi appi na fidduzza menu di ciriveddu, è cundannatu a la schiavitù.

A mia pari chi Platuni ed Aristotili, lu mastru e lu scularu, ponnu tutti dui tirari un carru.

### 3.

A munti dunca li pagani filosofi — parramu megghiu di li muderni.

E la solita vuci iu sentu — *I tedeschi, i tedeschi col Padre della Filosofia Alemana, Emmanuele Kant, e toccherete con mani di che possa l'umana ragione da voi calunniata. E via, signor Professore, fate senno: la filosofia tedesca da Kant sino a noi è tal periodo storico sì luminoso da lasciare indietro assai l'antichità tutta quanta. Basta il solo Kant a ciò.*

Ci rispunnu? Ciaju a rispunniri pri forza.

Beddu meu, lu to' alimannu Kant, lu zozzu di li filosofi Tidischi, nun raggiunau mai, o si iddu raggiunau, lu geniri umanu è privu di la raggiuni.

C'u avi lettu l' opiri di lu filosofu di Conisberga, sapi megghiu di mia li beddi promissi chi iddu fa a li so' lettori. Nun pari chi iddu vi farà tuccari cu li manu e vidiri cu l'occhi la stissa virità? e pacificari tutti li scoli, chi sunnu sempri a lichitedissi, chi annu sempri paroli avanti la sciarra? E mandari a casa di lu diavulu lu bruttu e fitenti scetticisimu? E cu lu so' metudu criticu, chi dici nun essiri nè scetticu, nè dummaticu, mandari 'nzemunula e scettici e dummatici a casa caudda?

Vi pari già chi lu Prussianu filosofu vi darà la scienza vera, solida, inconcussa, e pri usari li so' stissi paroli, comu la Geometria, stabili e ferma chiu di na rocca, chi nun cancia cull' omiuni e cu li tempi.

Già vi pari chi addiventiriti nautra divinità! Pò-viru vui si ci criditi!

Liiti cu mia li pagini di la so' *Dialettica trascindintali*..... chiu avanti!..... Chi vinni pari? Chi l'umanità tutta insenmula nun ha mai ragionatu, e nun po' ragionari, pircè la ragiuni è in idda stissa sufistica, e 'ntra la so' 'ntrinsica natura. Si la ragiuni si applica all' anima, a lu munnu, o a Diu, nun dugna autru chi apparenzi, sofismi, illusioni, chi iddu chiama, cu lu so' linguaggu sapienti, *paralogismi, antinomie, ideale* — Dunca stu munnu chi cosa è pri Kant? Illusione. — Dunca st' anima chi cosa è pri iddu? Illusione. — Dunca stu Diu, chi tuttu lu geniri umanu adura e timi, e chi tutti li cosi di la terra e di lu celu manifestanu cu la so' favella? Illusioni — Nsunma la umana ragiuni chi po' dari, chi dugna di risultati? Illusioni a tuttu pastu.



Sapiti comu è la raggiuni pri stu granni filosofu? È comu chidda chi avia Giufà, chi aspittava cu li mani aperti chi chiuvisseru ficu sicchi, passuli e ova mundati; ma li ficu sicchi, li passuli e l'ova mundati non chiuveru mai, nun caderu di l'aria — accussì la raggiuni umana chi cerca, aspetta a brazza aperti lu veru, nun arriva mai a nenti di veru, di certu, d'incontrastabili — chiui la raggiuni si sforza, chiù la rialità si alluntana, comu l'acqua chi sfui di li labbra sicchi di lu sitibundu Tantalù. E si pri casu iddu dici quarchi vota *iu e non-  
iu*, sunnu supposizioni, dici Galluppi, li pigghia a lucri dici Giuberti; e iu mi permettu di iunciri, chi sunnu giardinetti di dilizia 'ntra lu so' sistema, casteddi 'ntra l'aria, menu di li buseichi di sapuni.

Chi cosa è sta filosofia Kantiana? è na filosofia a vapuri.

Conchiudemu. O vui vuliti chi Kant raggiuna, o nun raggiuna: 'ntra lu primu casu, cioè si iddu raggiuna, allora lu geniri umanu nun avi mai avutu e nun avi l'usu di la raggiuni; passandu poi a lu secundu casu, cioè si Kant nun raggiuna, si la so' *Dialettica Trascendentale* è idda stissa sufistica, la matri o la nanna di tutti li sofismi, allora cu quali facci di cantunera di spitali sustiniri chi Kant fu un granni filosofu?

Vurria dirivi quarchi antra cosa di stu alimannu sapientuni, e farivi vidiri, comu quattru e quattru fannu ottu, chi iddu nun fu chiddu chi si va pri lu munnu dicennu da chiddi tali chi vonnu dari a eridiri chi lu suli spunta d'intinna ammari — sulu vi dicu chistu.

Doppu aviri fattu tantu fracassu, e terrimotu, doppu aviri tantu dittu e ridittu, frittù e rifrittù chi la ra-

giuni nun è ragiuni, ma sonnu, favula, e canzuna — a la fini quannu scinniu a parrari di li duviri, di la murali, allura dissi: e chi dissi? Chi la ragiuni è ragiuni, non è sonnu, non è favula, nunugna illusioni.

Iu fazzu un cunfruntu, un paraguni tra Kant e lu monacu. — Lu monacu avia na manu longa e l' autra curta; cu una pigghiava, cu l' autra nun dava. — Kant l' avia tutti dui longhi, giacchì chiddu chi vi avia livatu cu na manu, vi la ristituisci cu l' autra. — Chistu vi mustra Kant aviri cori bonu, ma pocu ciriveddu, pircchè sant' eramu unn' eramu.

Avia dunca ragiuni lo so famusu scularu Fichte, quannu dicia *chi tuttu è sonnu di sonnu, ma senza chiddu chi 'nzonna*; era lu legitimu discipulu di Kant, lu quali non accunsintennu a la spiecazioni di lu so' Anideu, avia tortu granni e sfacciatu.

Mi ricordu d' aviri lettu 'ntra un filosofu tidiscu, Volfu si nun sbagghiu, chi *Deus est Philosophus absolutae summus*. Ora si iddu è vero ch' Diu è lu filosofu assulutamenti summu, lu mastru di li filosofi; si iddu è veru ch' Diu, comu dici lu Murrialisi filosofu, quannu cria ci dugna jochi, ch' lu Miceli chiama *ludi*, jundi cunchiudu, ch' si lu filosofu divinu non pò fari autru cu la so' onniputenza ch' jucari, li filosofi umani tutti 'nsemmula non hannu datu e non putranu dari ch' jocareddi.

E si li jocareddi di Kant ficiru lu giru di lu munnu, puru la so' pirucca giriau pri tutta la terra.

E si li jocareddi di Kant hannu avutu tantu valuri, puru cu la so' pirucca s' inzaccava beddi dinari, ch' niscianu li curiusi ch' la vuliano vidiri, e si la

vntianu mentiri supra la so testa! Nun sunnu chisti pazzii supra pazzii?

## 4.

Giacchi parranu di tidischi, vi vogghiu cuntari na storièdda ch' avvinni a mia. Ju non mi rendu rispunsabili, comu oggi sunnu li ministri custituziunali e li gerenti di li giornali, di chiddu chi mi dissi n' amicu mie, omu dottu pri daveru — ma vi pregu di miditarilu assai e non pocu.

Iddu dunca, lu miu amicu, mi dicia: oggi li cosi di lu munnu vannu a scapituni, a rottura di coddu. E sai cu fu la causa di tutti li mali chi ci sunnu stati 'utra tri seculi? Luteru, ddu monacu, e sempri li monaci foru aciddazzi di malagguriu, Luteru chi misi avanti lu criteriu individuali a dannu di chiddu universali di la chiesa tutta 'nzemmula. — Da chistu ndi vinni na libirtà di piazari e di opirari chi nun avi limiti, — ndi vinni la morti di l' autorità, e varda comu ndi nasciu chistu. — Passatu stu principiu di la religioni 'ntra la politica, chi putia produciri? Lu dannu e li guai di tutta l' umanità. La ragiuni umana, chiamannu allura a sindacatu tutti l' auturità, pri mala vintura, comu si rumpi un fasciu di virghi, l' una doppu l' altra, li vosi rumpiri tutti, ma si rumpiu idda stissa. Oh pazzia! È tantu tempu chi lu principiu di l' autorità, lu principiu di lu drittu sinn' annau a fundu, e non c' è amu chi lu pò piscari. Ndi vuliti na prova bedda e chiara? Vi la dugu subitu.



Hobbis vidennu tutti li danni chi surginu di la sfrinata libertà, e scantatu di tuttu chiddu chi vitti 'nta la rivoluzioni 'ngresa di li so templ, si cuntintau megghiu di trasformari l' omu in sceecu, e dissi *obbedienza passiva*; accussì formulau tutta la vita politica di li populi. La potenza di lu Suvranu, cu fussi, fussi iddu, è irrisistibili, iddu cumanna a bacchetta, e guai a cu nun fa comu lu sceccareddu! Lu Suvranu è chiù di Dominaddiu, pirchè Dia voli 'nzò ch' è giustu, e pirchè è giustu lu voli — ma lu Suvranu di Masi Obbisi è propriu chiddu chi voli nzò chi ei piaci, e di lu so piaciri nun avi a rendiri cntu a nuddu. — Almenu ajù 'ntisa diri di taluni, chi lu Suvranu avi arrendiri cntu a Diu, ma pri Obbisi non avi a rendiri cntu manca a lu Diavulu!

E cuntinuava l' omo dottu dicennu: cu cridi chi Russò 'uzirtau, la sbagghia di grossu. Iddu è veru chi l' auturi di lu Cntrattu Suciali nun trasforma l' omu in sceecu, comu avia fattu Obbis; voli Russò travari na cosa stabili, ferma, e puru, si vuliti, murali; ma chi vuliti chi vi dicissi, si Russò scanza lu crapiceciu di lu tirannu e l' ubbidienza passiva di l' asinu, sbatti 'nta nautru scogghiu, e si fracassa tuttu lu ciriveddu, pirchè vi dugna lu piaciri, lu crapiceciu di lu populu: iddu è veru chi l' auturi di lu sociali cntrattu vi metti avanti dda bedda frasi *Suveranità Popolari*, ma li frasi non cancia la natura di li cosi, e lu munnu non si pasci e campa cu li frasi. La Suveranità di Obbisi è l' arbitraria volontà di unu sulu. — La Suveranità di Russò è l' arbitraria volontà di lu populu. La Suveranità di

Obbisi è nu mostu individuali, chidda di Russò è un mostu populari. — L'Obbesiana è un mostu cu na testazza, chidda di Japicu è un mostu cu mighghiera di testi, grossi e picciriddi, di tutta tagghia.

Leggi sta pagina di Russò, mi dicia lu meu amicu sapienti, e vidirai chi l'auturi di l'Emiliu metti a principiu di la so Sovranità populari lu crapicciu di lu populu.

*Un popolo è mai sempre il padrone di cangiare le sue leggi, anche le migliori, perocchè se gli piace far male a lui stesso, chi ha il diritto d'impedirlo?*

Quannu dunca Petru Leroux dissi, chi Russò era chiù di Gesù Cristu, non ghiastimava? Oh quantu jastimi sannu dittu puru 'nta li nostri tempi, chi passanu pri 'lluminati! Ju cridu chi Leroux dissi ddu bavornu, pircchi avia prisenti ddi paruluni di Japicu— Chi chiddu chi lu primu dissi 'nta stu munnu: sta cosa è mia, fici un delittu di lesa umanitati. A mia pari chi chista è la lastima di tutti li povireddi, chi vonnu viviri e scialarisi cu la robba d' autru. Ed è la lastima di tutti li tempi!

Non vurria essiri mala lingua — Russò facia sti lastimi e chiagnisteci contra li ricchi e li proprietarj, pircchi campava affrittu, ma rittu, copianu carti di musica a Parigi.

Dunca è chiaru chi Obbisi, Russò, Leroux s' impignavanu a riabilitari lu piaciù, lu crapicciu, lu libitu — cosa vecchia e riditta di l'anabatisti, ma da chiddi trasportata 'nta lu campu sociali.

E siccomu di cosa nasci cosa, e l'erruri pari sempri beddu, puru Caru Fourier, l'inventuri di lu Fala-

steru, dissi chi li passioni veninu di la matri natura, li duviri di l'omini — dunca guerra a lu duviri, mintemu 'ntronu li passioni.

## 5.

A stu locu lu bravu miu amicu si firmau — nisciu la tabacchera, pigghiau tabaccu, poi addumau la so' pipa — Seguitati iu ci dissi — E iddu a mia — Chi vi ajù a diri; tuttu è negazioni 'ntra la scienza, e per ciò 'ntra la società chi si specchia cu idda è in idda. Lu drittu, lu duviri, la liggi murali stissa, chi duvria essiri la suvrana assoluta, è nenti, e poi nenti, e sempri nenti.

Pari chi ddu filosofu Greeu, chi dissi chi la liggi è comu la fulinia di la tarantula, la quali fa cadiri 'nterra li corpi 'pisanti, ma tratteni chiddi leggi comu la pagghia, dissi na granni verità. Comu Spinosu e Obbisi chi dissiru chi lu drittu è la stissa cosa di la forza, dissiru na bedda verità di fattu. Iddi, è veru, ficiru sbagghiu assai grossu 'ntra l'ordini razionali, ma pri lu fattu e pri la storia 'nzirtaru.

Pri mia la forza avi a essiri lu menzu pri fari valiri li nostri dritti, pri difendirli, tutelarli, e ricupirarli — senza forza nun ci poti essiri eserciziu di drittu, comu senza pinneddu nun ci pò essiri pittura, senza pinna scrittura. Ma viditi d'undi e comu ndi vinni l'erruri chi cunfundi lu drittu cu la forza. Siccomu pri figura si dici di un bonu pitturi chi è un bonu pinneddu, e d'un bonu scritturi chi è na bona pinna; accussi cu avi chiu forza si dissi, e si dici, e si dirà sempri, chi avi drittu.

Senti, amicu miu, la forza è cumpagna di lu drittu, ma è na cumpagna pericolusa, infidili, chi spissu ammazza lu stessu drittu.

Si Cesari nun dispunia di tanta forza, nun ci vinia lu sfilu di passari lu Rubicuni. Si Napuliuni Primu nun avia dda granni forza nun cacciava a culazzati di fucili li cincuentu. Si lu Terzu Napuliuni n'avia dda forza chi sapemu, lu seculu nun aviria vidutu lu dui dicembri; et sic de singulis.

Granni forziavianu Cesari e li dui Napuliuni; duncaavianu drittu. Bedda, ma fatali figura rettorica!

Si nun sbagghiu lu corpu di statu di lu dui dicembri fu ludatu 'ntra lu Parlamentu ngrisi da Lordu Palmiston, e n'avia ragiuni, pircchè lu mali cuntagiusu putia passari lu strittu e 'mpistari l'Inghilterra — Fioi beni dunca lu Prisidenti di la repubblica chi l'ammazzau. Avia ragiuni lu Dipromaticu 'ngrisi, lu diavulu fa diavulicchi! E puru ddu granni Ministru, chi avia l'occhi di Argu, nun vitti e nun s'addunau pri nenti, chi la timuta pesti ci trasia 'ntra lu regnu di nautra parti cu lu Fenianismu!

Così di lu 'nfami munnu! L'ingrisci chi scialavanu e ridianu di li rivoluzioni di l'autri paesi, e iddi stissi ci li attizzavanu o li stutavanu a so' piaciri — di sti tali 'ngrisci quantu così si putissiru diri!

Sentu parrari spissu di giuramenti, di cuntrattu, di pattu sociali! Aimè! fulinii di tarantula! sì, fulinii di tarantula, senza dda liggi suprema chi Ciciruni dicia *Summa Ratio*, e l'Aquinati *nec ejus lex est aliud ab ipso, unde æterna non ordinatur ad alium finem* (1), e

(1) Unde patet quod lex naturalis nihil aliud est quam participatio legis æternæ in rationali creatura — *Summa Theol.*, par. II, Quæst. XII, art. 11.

Dante *divina voluntas sit ipsum jus*; la quali riverbirannu 'ntra l' umana cuscenza pò purtari felicementi l' animi 'mportu, comu la vila servi di guida a la navi.

E cca si zittiu lu miu amicu — e seguitu ieu.

## 6.

Pari a mia chi si travagghia *cum ecclis et remis* pri cacciai stu Diu, e mandarlu a spassu na vota pri sempri; ma iddu avi la facci tosta, e nun senti l'affrunti e li rimproviri chi ci chiovinu d'ogni banda!

Si na vota un filosofu tidischu dissi a vuci forti di la cattidra: *Oggi crecremo Dio!* Ju sacciu chi nautru filosofu viventi, italianu, avant' eri dissi puru di la cattidra, isandu lu vrazzu rittu all'aria, e strineccu lu pagnu: *Dio ritirati!* e pri tri voti.

Si Fichte si mustrau, comu un chimicu, chi voli ricumponiri chiddu chi avi decumpostu, o di un furnaciaru chi dicissi: oi facemu na pignatedda o un tiganeddu — lu nostru italianu Ferrari chi ci dici, chi manda a spassu Diu, mi pari un patrui chi licenzia lu criatu — almenu ci avissi datu la benseruita!

Puru la Cunvenzioni francisa, trasfurmannusi in Cunciliu Ecumenicu, dicritau na vota chi Diu esisti, comu chi s'avissi trattatu di na liggi civili o criminali chi fussi. Oh, ddi francisi n'hannu fattu puru grossi assai 'ntra menu d'un seculu! Hannu distruttu dinastii, altari, liggi, statuti, ed hannu criatu principi, religioni, liggi. Hannu mandatu a diavulu re, repubblichi, cunsuli, presidenti..... e chiddu chi mandirannu appressu lu sapi



Diu! Eppure, mischini! sunnu ancora comu l'anima di li sbirri!

Pri mia vi dicu chi tutti l'omini sunnu foddi, ma chi li chiu foddi sunnu li sedicenti filosofi; e si chistu nun lu dici la Santa Scrittura, vi lu dicu ju, chi macari, si nun autru, aja sfugghiatu quarchi carta di Platuni, di Aristotili, di Agustinu, di Vicu, di Gioberti, di Rosmini, di Galuppi, e puru di chiddi chi si fannu 'nciuriari filosofi, e sunnu foddi 'ntra la carni e 'ntra l'ossa.

Mi ricordu chi Fidiricu lu filosofu dicia: Quannu vogghiu puniri li mei populi, ci mandu pri guvinnarli li filosofi. Ah chi beddu spedienti scatinari ddi filosofi di dda tempra di Lamathrie, chi cripan ala so tavula riali cottu comu un jammuru e abbuttatu comu un porcu! Oh chi beddu espedienti, chi dimostra chi li filosofi sunnu li chiu foddi 'ntra l'omini!

Lassamu di parti li filosofi chi sunnu d' autri paisi, parramu na picca di ohiddi nostri.

Oggi ponnu spajari tutti pari pari Anzelmù, Tummasi, Bonavintura, Danti, Vicu, Gerdil, Galuppi, Gioberti, Rosmini, e tutti li so sculari.

Chi ci vasi ad Anzelmù essiri lu funnaturi di l'Ontologismu 'ntra lu Mediu Evu cu la so famosa *prova a priori*, accittata dallu stissu Aquinati, e a Bonavintura lu so' *Itinerario di la mente a Diu*, chi superò lu stissu Platuni -- a Danti chi nelli concettu filosoficu di lu drittu lassò arreri lu stissu stagirita, e tutti li filosofi chi foru e chi nascirannu a lu munnu, comu dici ed affirma lu filosofu tidiscu Sthal — Chi a Vicu l'essiri acclamatu lu fundaturi di la so bedda e sublimi Scienza

Nova, chi mancu cunusciu Sant'Agustinu 'utra la so sorprendenti *Città di Dio*, nè l'insigni auturi di lu *Discursu sulla Storia Generali* — iddi, sti dui Viscuvi, trattanu l'argumentu teologicamenti.

Già puru lu stissu summu Romagnosi avia avutu paroli prima di la sciarra cu Vicu, chiamandulu *auturi d'un presentimentu fantasticu*, e tanti autri beddi paroli.

Ma oi? Oggi di Vicu si arrivò a diri, chi iddu lu granni napulitanu, nun avia filosofia. Nun mi criditi? Liggiti Angustu Vera, e vi convinciriti chi tutti li filosofi sunnu nenti, macari lu stissu Vicu, auturi senza filosofia.

A Rosmini e a Gioberti nun ci mustranu li nostri muderni filosofi tanta 'ncagna, anzi mi pari chi vonnu fari l'amuri cu iddi pri tirarili a la so' parti.

Pri Giuberti, piseannu lu valenti Spaventa 'ntra l'Opiri Postumi di lu Turinisi quarchi frasi nun svilupata, quarchi cuncettu nun chiaru, ci voli rialari la sumigghianza 'ntra Gioberti e lu so' prediletta Hegel, senza accorgirisi chi l'Opiri stampati di lu summu auturi di lu Primatu stannu chiantati supra lu princìpiu di la Criazioni, chi si la fa a cazzotti cu la filosofia pantiistica di Giorgi. 'Ntra l'italianu filosofu e chiddu alimannu o' è n' abissu chi li dividi, e chi tutta la potenza di la menti di Spaventa nun pò culmari.

Nun parru di Giurданu Brunu, a iddu l'alliffanu, pirci! l'hannu nautru Spinosu; anzi, mentu pri mia, Spinosu esaltatu, chi quarchunu ha dittu Spinosu 'mbriacu!

Poviru monacheddu di Nola fu arsu vivu comu un purci! Din ci avia datu tantu 'ntellettu, tanta fantasia

e tantu cori, e la fantasia, lu focu di la passioni, e chiu lu tradimentu e li farisei,... lu ficiru bruciari vivu e 'ndi ficiru spargiri li cinniri a lu ventu! Quannu li giudici ci annunziavanu la sinteuzza di morti trimavanu, comu na foggia di canna — e Giurdanu cu dda forza chi veni di l'innucenza e di la superiorità chi sintia 'ntra iddu in cufruntu di ddi carnifici, cu la forza di un liuni e tisu comu un taddu di Giuda, ci dissi: *Majori forsau cum timore sententiam in me dicetis, quam ego accipiam*. Chistu mi ricorda, chi 'ntra ddi tempi jittari 'ntra li fiammi un omu era comu fumarisi oi un sicarru!

Ju nun pozzu lodari la cundutta di Brannu, di Vannini, di Arnaldu, di Paleario e d'autri, ma darili a lu focu sulu pirciù pinzavanu a modu so', ah chistu no, nun è agiri di cristianu, mancu d' omu!

Pri mia cridu chi Diu misericordiusu avirà fattu chiu bona cera alli vittimi 'nfelici chi ali carnifici spietati!

Veru iddu è chi bisogna guardari li cosi e l'avvinimenti cu l'occhi di ddi tempi, comu in grazia di esempiu, a ddi tempi e 'ncostu ad iddi, li stissi repubblichi famusi, lu sacciu ju, avianu liggi veri barbari: cu rubbava na junta di liri avia tagghiata na manu, cu 'ndi ranfuliava lu duppiu, o era ricidivu, senza misiricordia ci tagghiavannu tutti li dui manu — si sciurbavanu allura l'omini, comu 'nzinavanteri si livavano l'occhi cu lu ferru 'nfucatu a li cardiddi, rappareddi, zuini e spunzuni. — Allora lu vassallu chi ammazzava la palunuma di lu so' principi, era cundannatu a morti, ma si lu principi ammazzava lu vassallu, ch' era un' uomo, comu tutti li principi di la terra, si la passava pagannu pochi liri. Chi liggi di Dracuni quannu lu tagghianni era interpretatu material-

menti! Sacciu chistu e sacciu antru macari, ma chi vuliti, bruciari un omu vivu, pirlu pinzava a modu so, era na barbarii inqualificabili. Ma tant'è Brunu fu arsu vivu, mentri era Pontifici Clementi VIII, chi li storici imparziali e nuu sùspetti, ci dànu di bona pasta, e cu la direzioni di li Cardinali San Severinu, Aldobrandini, e Bellarminu, quantunchi chistu era gesuita, e si sapi chiddu chi successi 'ntra lu Conclavi, quannu lu vulianu criari Papa — si jisau un Cardinali e ci dissi a vuci forti, comu un spiritatu a li so' cullegli: *Dignus, sed Gesuita*.

Ma chi vuliti eranu accussì altirati l'omini 'ntra autri tempi, chi lu stissu San Binnardu, lu mellifluu dutturi, cunsigghiava di bruciari vivu ad Arnaldu di Brescia!

Quannu jeu penzu alla fini di Brunu, chi la eloquenti e sapienti parola di Cousin inzerta dicennu, *la trace lumineuse et sanglante* 'ntra la storia di la civilizzazioni, m'acchiama lu diavulu!

Comu Adamu nun potti agghiuttiri ddu grossu pumu, accussì l'omini di ddu timpazzu nun pottiru calari ddi pinnulli chi Brunu ci dava, e chiui chidda grossa grossa, di *Lu spacciu di la Bestia Triunfanti*.

Ju non fazzu ecu a li so' erruri, ma comu talianu vi vogghiu ricurdari ddi so' beddi palori.

*Italia, Napoli, Nola, quella regione gradita dal cielo, e posta insieme talvolta capo e destra di questo globo, governatrice e dominatrice de le altre generazioni, è sempre da noi et altri stata stimata maestra, nutrice e madre di tutte le virtudi, discipline, umanitati.*

E poi cu qual' impigna mi putiti nigari chi l'omini sunnu pazzi, sunnu privi di l'usu di la ragioni?

Ju sugnu catolicu, nun mi virgognu, anzi puru mi vantu di dirilu, e l'aju stampatu, mi dispiaci, e quantu, di l'erisia; bramiria e vurria vidiri 'ntra tutta la terra un pasturi sulu ed un covili — preju pri li travianti e li raccumandu a Diu — ma ju nun fussi capaci alli eretici, sulu pirchi eretici, sciupparici un pilu di la barba.

Ju mi tegnu forti cu la Santa Scrittura e cu li Patri — juaju l'occhi all'istituzioni e non all'omini. Ju sugnu cu lu gran Viscuvu d'Ipbona, chi dici: *Dilige homines, interficite errores*. — Sì, amuri all'omini, morti all'erruri.

## 7.

Ma vutamu la facci di l'erruri e virgogni di l'omini, e turnamu arrieri pri vidirinni autri.

Ju vi dicia chi li nostri filosofi sinu ponnu andari a cogghiri cauliceddi, o procchia, o pezza pri li strati, o nuzzuni di sicarri pri la via. Vuliti sapiri cu l'avi dittu? l'avi dittu lu signuri Augustu Vera, a cui sempri ci levu la birritta. Iddu dici, chi lu filosofu veramenti filosofu, lu filosofu chi tuccau la cima di dda sapienza, a cu nuddu avia pututu arrivari è Giorgiu Hegel. E nun c'è autra filosofia chi chidda so'.

Ju mi ricordu di na proposta di Ugu Fosculu qualmenti vulia tirari tuttu lu sucu di tutti li libbri, e ficcarilu 'ntra un migghiaru di volumi — e bruciari poi tutta dda rubbazza vecchia chi ristava.

Ma megghiu fannu pri nui li palori di lu nostru sicilianu Musumeci, chi tantu foddi pri l'opira soi di

la *Gran Teoria di la Conservazioni*, ci dicia un ghiornu a n' amicu so' a Napuli, mentri eranu 'ntra la lucanna: Bruciati tutti li libri di tutti l' auturi, chi ci sunnu stati a lu munnu, pirciè sunnu pari pari tutti 'mpusturi — l' opira mia è la sula virità!

Chi vindi pari, nun c' azzicca? E si a li palori di l' Onurevuli Vera si junci puru chi Michelet, filosofu tidiscu, parrannu di Giorgi, di la so' catrida a Birliu, isannu l'occhi a lu celu e juncendu na manu cu l'autra dicia: *Giorgio Hegel era un santo!* E quasi quasi nun chiancia ddu affezionatu scularu pri la santità di lu so mastru!

Viditi, ora mi vaju pirsuadennu megghiu, chi la filosofia di Hegel nuu è chidda chi va spacciannu lu signur Vera. — Nun avi tantu tempu chi certi filosofi pri 'nsinuari li duttrini di l' auturi famusu di l' Etica, di l' occhialaru d' Amsterdam, dicianu chi iddu era murigeratu, tantu murali, chi iddu era 'nsumma un santu! Viditi chi lu stissu Vittoriu Cousin si fici licitu paragonari Spinoza cu l' auturi di l' *Imitazioni di Cristu!*

Mi pari chi a stu modu sinni va a Diavulu la libirtà di pinzari e qualunqui discussioni libira, e senza preoccupazioni — s'arriva a la infallibilità di lu mastru pri nautra via!

Poviru Mariu Nizzoliu chi prima di Cartesiu avia proclamatu ntra la nostra Italia cu l'opira so' — *De veris principiis et vera ratione philosophandi* — la libertà di filosofari; dicennu 'ntra tanti beddi cosi, chisti chi vi vogghiu ricordari: • Generale principium veritatis est libertas • et vera licentia sentiendi ac judicandi de omnibus rebus • ut veritas ipsa rerumque natura postulat. Hoc est,

• ut is qui recte philosophandi studet, ante omnia  
 • liberum se conservet ac solutum ab omni philosopho-  
 • rum secta, nec ulla cujuspuam viri quamlibet magni  
 • doctrinæ fama ita teneatur astrictus, et quasi com-  
 • peditus, qui quæ ipsi pro rei veritate probanda aut  
 • improbanda videbantur, ea libere, et sine ullo im-  
 • pedimento probare, aut improbare » (1).

E puru li so sculari, di Hegel, nun ci eridinu a tuttu chiddu, chi si va chiacchiarianu 'ntra di nui, pircchi ognuno d'iddi penza a modu so'. Si hannu divisu in destra e sinistra, comu 'ntra na cammira legislativa, e poi si la fanno a cazzotti, e cu poti chiu si la porta.

Ndavi difattu 'ntra li so sculari atii, materialisti, fatalisti, panteisti, e tutti figghi di lu stissu patri! Lu quali, dicemu la virità, avia dittu, chi la so' dottrina era tanta profunna chi nuddu di li so' discipuli l' avia caputo — forse uniddu sulu, ma nun beni.

Dunca ju cunchiudu: la filosofia di Hegel nun era pri l' omu da nui cunusciutu, ma forse pri nautra razza nova, o megghiu, pri nautra specii. La nostra è trop- pu assai foddi, chidda chi venirà di 'la dicantata tra- sformazioni, sarà megghiu organizzata — e perciò menu pazza.

Ora cumprendu li paroli di San Paulu, quannu dici: Guardativi chi quarchidunu nun v'inganna cu la filosofia.

E dicia beni Paulu, si li filosofi sunnu 'ntra l' omi- ni li chiù pazzi; era giustu e sanu l'avvirtimentu.

E poichè la lingua dissi Paulu, e li palori sunnu comu li cirasi, vogghiu diri puru chi Paulu senza

(1) Lib. 1, cap. De vera rat. phil.

vantarisi filosofu, pridicau 'nmenzu li filosofi 'ntra l'Areu-pagu, e li so' beddi e sublimi cuncetti passanu chi sunnu di chistu e di chiddu!

E dda fratillanza universali 'ntrà tutti l'omini e li populi di la terra — la solidarietà 'ntra iddi, pirchè sunnu membri di nu stissu corpu, chi avi un sulu e stissu capu, e si unu d'iddi si doli, l'autru ndi pati. E accussì via dicennu...sunnu farina di lu granni saccu di Paulu, e nun di li sacchi di tanti autri chi dānnu a cridiri mari e munti, e poi finiscinu cu manifestari la so' pazzia.

E sapiti undi è la pazzia di tali e quali filosofi? È in chistu, chi scurciaru di l'Apostulu di li genti ddi granni virità, ci livaru la parti positiva, li fleiru astratti e peju, e li vannu pridicannu pri lu munnu vecchiu e novu senza autorità, senza liggi e senza Diu, comu pazzi chi sunnu e sarannu, mustraunu nun aviri l'usu di la bedda raggiuni.

## 8.

Basta pri lu mumentu di li politici e di li filosofi, videmu si putemu 'nzirtari la casedda unni si trova ammucciata la bedda vantata raggiuni. Mi votu a lu campu ecunomicu, e a mia pari chi mancu cca c'è spiranza di trovarli la tana o lu jazzu di sta criduta rigina di li omini.

Quannu si parra di ricchizzi li muderni 'ndi vonnu centu a majorea. A mia pari chi cca puru la raggiuni ha fattu fiascu.

Ju lu sacciu chi oi la summa di li ricchizzi, di li menzi di godimentu, di li cosi pri sudisfari li bisogni



è granni assai, e supira in quantità, pisu e misura zoccu avianu l' antichi nostri patri.

Oggi un arripezzaturi e un custureri hannu chiu cumuditati di lu granni Agamennuni, di lu re di li re — a lu quali 'ntra li jurnati d'invernu tuccava stari 'ntra li so cammiri a lu scuru — quannu avia la flassioni o forti catarru s'avia a stujari lu nasu cu li jdita, o cu lu mantu riali. Senza cannmisa di tila o di musulina stava 'mmugghiattu 'ntra la lana di stati e d'invernu; senza fari pinitenza era un veru cappuccinu.

Un custuriricchiu avi la so' 'nvitriata, e godi di la bedda luci puru 'ntra li jurnati chiu seuri — avi lu so fazzulettu pri lu nasu — avi la so cammisa di tila o di musulina, e robbi pri lu friddu e pri lu caudu.

Lu granni Agamennuni o un so pari, re, magnatu, 'imperaturi, quannu c'indebulia la vista, nun avia chi fari, mancu si putia diri lu rusariu, pirchl eranu turchi o brei.

Quanti beddi cosi ci sunnu ora?

Vui li sapiti, e perciò vaju avanti.

E puru cu tuttu chistu l'omu nun avi avanzatu, s'avi 'mbrugghiattu peu, e rvinatu.

Eccumi a li provi. E quanti provi e riprovi putiria darivi!

Si eridi chi quannu si junci a mentiri ricchizzi, supra ricchizzi, d'aviri chiu 'ndustria e traficcu, chi s'avi fattu tuttu. Gniurnò, gniurnò pri centu milia voti. Aumin-tannu li suli godimenti, li suli utilità, piaceri e comodità, cu chistu sulu l'omini s' imbriccanu 'ntra li piaceri di li senzi, nun sentinu chiui o pocu li nobili aspirazioni pri lu beddu, pri lu veru, pri lu santu, e pri lu giustu, e 'nfangati 'nzina a la gula, comu li porci,

'ntra la materia, sentunu sulu li cosi materiali, e macari 'ntra lu sonnu, comu l'arnaluzzu di Sant' Antoni, 'nzonnanu la ghianda. E accussì, accussì a picca a picca, di mali in peju, 'ndi veni ddu spaventivuli regressu, chi Diu mindi libira.

E pircchi tuttu chistu?

Pircchi quannu li beni materiali criscinu in abbundanza, si nun si teni forti 'ntra la società na granni dosi di giustizia, di bontà, di boni costumi, e chi sacciu ju, sindi veninu comu tanti diavuli li discordj, nasciu tutti li gilusj, e tutti li passioni scatinati custeranu la povira umanità.

Chiddu chi ju vi diu è lu vangeliu di la Santa Missa — E si nun aviti fidi a mia, sintitulu puru di la bocca di dui omini granni, unu di lu Belgiu, e l'altu Italianu.

Dici lu primu, lu Signuri Aharens: « Il materialismo disapprovato in teoria, regna generalmente nella pratica: la novella potenza industriale, senza contrappeso morale, ha favorito siffatta tendenza, e la corruzione si accrebbe coi due estremi dell' opulenza e della miseria: ogni cosa attesta una scostumatezza, una corruttela che invase tutte le parti del corpo sociale » (1).

Chi vindi pari?

Sintiti ora lu sapienti Conti T. Mamiani di la Roveri: « Ella è una verità confessata oggimai da quanti col pensiero mnovono in traccia di un rimedio e di una correzione efficace a guarire la nostra generazione

(1) Aharens, Corso di Dritto Naturale, vol. 1, p. 1, cap. II, § X.

• da quell'anarchia morale ed intellettuale, onde gli  
 • animi sono pur troppo afflitti e travagliati, che il  
 • male attese le profonde radici che ha messo prima-  
 • mente negl' intelletti e nei cuori, poi di mano in mano  
 • nei costumi e nell'ordinamento civile medesimo • (1).

Ju vurria chi tutti avissuru presentì li paroli di li  
 dui citati sapienti, chi sunnu verità vangelichi.

Ahimè! L'omini sunnu fatti accussì storti e mala-  
 retichi, chi s'abbagghianu di l'apparenzi, vardanu la  
 la forma, e no la sustanza, vardanu la parti acciden-  
 tali e nun chidda essenziali, e tutti 'ncantisimati di li  
 'llusioni di così fausi chi li sciorbanu, cunfunnu la vera  
 civiltà cu chidda fausa, chi si spaccia pri chidda vera.

Ancoraaju ntra l'oricchi li paroli di lu summu  
 Romagnosi: « Quando tu mi mostri solamente scritte,  
 • pitture, sculture, so io forse se un popolo sia prov-  
 • veduto di vitto, di vestito e di abitazione? Quando mi  
 • mostri armate, corteggi, consilii, feste, conosco forse  
 • se egli gode pace, equità e sicurezza, mediante buone  
 • leggi, un' equa amministrazione, ed un potente or-  
 • dinamento? » (2).

E puru sunnu digni di ricurdarisi st' autri ditti di  
 n' autru auturi, li quali sunnu accussì beddi, chi parunu  
 fatti a posta pri nui.

• Il falso colle apparenze del vero, il male colle  
 • apparenze del bene, scuote l'occhio volgare, ma  
 • alla vista penetrante del sapiente è la cronica infer-

(1) Saggi di Filosofia Civile tolti dagli *Atti Accademici di Filosofia  
 Italica*, e pubblicati dal suo Segretario Prof. G. Boccardo — Genova 1852,  
 pag. 3.

(2) Dell' Indole e dei Fattori dell' Incivilimento, p. 1.

• metà della vita degli stati con il lieto colore nel  
 • sembiante di florida salute; è un vizio organico del  
 • corpo sociale, che ne consuma la vitalità, mentre  
 • che i sintomi esteriori accennano vigore di fibre e  
 • di nervi; è un moto retrogrado, o mal diretto della  
 • società, che si avvicina alla morte politica, e copre  
 • la ritirata o il traviamiento con artefatti splendori,  
 • che agli occhi del filosofo sono i presagi dei suoi fune-  
 • rali. E così brillando, si estinguono, a similitudine  
 • della fiamma artificiale, che, mancando di alimento,  
 • più crepita e brilla, quanto è prossima a perdere la  
 • sua vita splendida » (1).

Sintistu? Jeu speru chi li cosi 'ntra stu munnu  
 nun andassiru accussì di mali in peju, e chi avvanzannu  
 cu la pala lu beni matiriali nun si vidissi viuiru menu  
 chiddu murali. — 'nsumma chi nun fussiru in ragioni  
 'nversa.

9,

Speramu! la spiranza, dissi un filosofu chi era  
 poeta, forma parti di l' umana felicità. — L' auturi di  
 l' *Assediu di Firenze* dissi chi era la m..... di la vita —  
 pri mia è na ddecata di meli chi hannu li veleni di  
 la vita — All' omu agghiuttennu velenu, ci pari cu  
 dda ddecata di meli, di manciari così duci.

Nun finiscinu cca li mali di lu munnu economicu  
 cu tutti li granni Econonisti, accuminzannu di Serra,  
 Ortis, Giuvisi, Smith.... e finennu a lu viventi nostru  
 sicilianu Ferrara, e puru a lu miu valenti amicu Maju-  
 rana Calatabianu.

(1) Vedi Antologia di Firenze, n.° 14 del 2.° decennio.

Vi ricordu lu misi di Giugnu 1848, quannu 'ntra Parigi lu repubblicanu Genirali Cavignac appi a nesciri cu n' armata di surdati e cu tanti cannumi pri cum-mattiri; chi cosa? li ligittimisti? gnirnò — pri cum-mattiri a cni? li Orlianisti? gnirnò, gnirnò. A cu dunca la Repubblica francisa vulia distruggiri? Vui lu sapiti, lu Sucialismu, lu Comunismu. Nun si trattava chiui di ddu campiuni chi avia fattu Ricu Saint Simon, chi bastaru na cumpagnia di granateri a li tempi di Luigi Filippu a sdirrignarilu nun lassannu petra supra petra. Iddu già Sansimuni, comu profeta, mentri stava rinnennu l'anima a Diu o a lu diavulu, ci l'avìa dittu a littiri di scatula a li so' sculari: *La poire est mure, vous la cullierez*, chi vi vogghiu traduciri accussì: *Beddi figghi mei, ju moru, mindi acchianu leggiu leggiu, badati a vui, la pira è fatta, vui cun santu la putiti cogghiri*. Sapiti vui chi è la pira sansimuniana? è la robba d'autru.

Nui semu 'nnuccenti assai! robba d'autru, vali a diri chi la propietà è un drittu, ma si idda è un furtu, allura li propietari su tanti latrì — dunca è logicu, ad iddi! ad iddi!!!!

Ju nun cuntù favuli, ma ricordu verità dulurusi o di fattu.

Cu assaggia ddi liggi fatti supra dda basi, cu ddu spiritu, peu di chiddu a prova di pruvuli, cumunista si addicca li idita. Sunnu pri menu mali tassi nun supra li frutti chi dughnanu li propietà, ma supra la propietà stissa, cioè, mi spiegu megghiu, nun sunnu tassi supra lu fruttatu, ma supra la cosa stissa, livannuccinni na ritagghia; e na ritagghiedda oi, nautra dumanì.... Ah chi bruttu jocu, chi laida tendenza chi viu!

Si, diciti a chiu nun pozzu chi l' omu avi l'usu di la ragioni?

E poi vutamu nautru foggiau.

Comu vuliti chi avissi l'usu di la ragioni chiddu chi chiamasi vulgu, si vui aviti fattu ogni cosa pri purtarilu al a guerra contra Diu, contra li ricchi, li propietarj, li capitalisti... sirvennuvi di dda malintisa eguaglianza e fratillanza, pri nu ricurdari autru? Chi spiegati a modu vostru, lu renninu salvaggiu, barbaru e quarchi cosuzza di chiu tintu. Si vui ci aviti dittu puru chi iddu è Diu! Lu puvireddu ripenza a li vostri ditti, chi s' avi agghiuttutu, e ci cogita supra pirchi annu pri l' utili so', e dici 'ntra iddu stissu: si ju sugu Diu, comu lu riccu, comu lu propietariu, lu capitalista, comu lu meu gnuri, chi ragioni ci è chi jeuaju a travagghiari tuttu lu jornu e li ricchi starisinni a spassu? chi ragioni ci è chi jeuaju a caminari a pedi scausi, malu vistutu, tuttu ripizzatu, e iddi 'ntra li beddi carrozzi chi si paparianu, vistuti cu lussu a la Lion? Chi ragioni chi iddi si annu a fumari li beddi sigarri di la vana, e jeu, a quannu mi tocca, un muzzun di sigarru scarfidutu? e pri iddi lu tiatru, li festi e giochi e jeu nenti? chi ragioni chi a mia avi a tuocari un pezzu di pani e furnaggiu e un biccheri di vinu acitu, e ad iddi li beddi pitanzi di carni, pisci, caccia, jaddini, e picciuni, pastizzi, vini d'ogni sorti e d'ogni maniera, e tutti li piaciri? Pirchi iddi hannu a cumannari e natri povireddi a serviri? Sunnu forsi figghi di la jaddina bianca? Unn'è chi lu sulì quannu nesci iddu nesci pri tutti? E chi l'acqua chi chiovi è manna pri tutti? E 'nsinu a cca ci sunnu pinzeri e nenti

autru chi pinseri. Ma si lu Diavulu ci ispirassi....? Jeu dicu lu veru chi ci hannu fattu perdi lu ciriveddu. E guai cu la pala ci sarannu, si tutti li sonni e l'eruri, si pri malasorti si andassiru allargannu, pri poi viniri avanti 'ntra la povira società, chi avi a essiri sempri, o si voli o nun si voli, fundata su la riligioni, la famigghia, la proprietà — e perciò supra la morali, supra lu daviri, supra lu Guvernu.

Poi ju dicu, chi è na vera 'mpirtinza e na granni 'ngiustizia soffriri a vidiri un Diu mortu di fami, tuttu strazzatu e tuttu lordu, e chinu di mali e chiu soecchu di li scecchi!

Cu quali curaggu ci putiti diri: Stadduni ignobili di razza umana?

Oh foddì, foddì, si sta divinità poviredda si risvigghia, e senza misericordia, unni andirannu li ricchi?

Jeu lu sacciu, e l'aju scrittu, chi trasformari la plebi in populu è cosa giusta.... ma dda riabilitazioni chi vannu chiacchiarianu nun avi chi fari cu la trasfurmazioni, sunnu cosi di romanza. E iddu li romanzi e li giornali, tali e quali, hannu vastatu la menti e lu cori di la povira genti! Hannu vulutu alcuni auturi rivilari quarchi chiaja, comu iddi dicinu, di la società, e pri mala vintura senza dari rimedin, hannu 'nchiajatu tutta para para, 'ntra ddi paisi maggurmenti, l'affritta società.

Ah, si fussi cca lu miu amicu Masi Gullu, chi dici chi la raggiuni, la quali scinnin di l'antu, lu partò autu autu a truvà lu motu perpetuu — ci diria valenti omu, und'è sta raggiuni chi tantu magnifici, si tutti l'omini sunnu pri lu menu foddì? mi suppognu la so' risposta

chi saria comu chidda di Archimedi, senza 'mpirò andari a la nuda pri li stradi — *L'aju truvatu, l'aju truvatu!*

Ju fazzu uu dilemma: O Gullu ha truvatu o non ha truvatu lu motu perpetuu — Si iddu l'avi truvatu, l'umanità ndi aviria un beni; si nun l'avi truvatu, allora pri lu miu argumentu ci saria un beni, pirchi aviriamu nautru foddì di chiu.

Ju disidiru stu casu. Chi vuliti tiru bracia pri lu miu cudduruni! Dunca è pazzia, nun darici 'ntisa.

Speru chi finissi sta cumeddìa di lu motu perpetuu, e chi li me' paroli fussiru benignamenti ascultati, pirchi quannu si voli, senza fari na nova liggi a posta, si po' truvà lu menzu di sintirilu senza pregiudiziu di nuddu.

## 10.

Continuu la mia cicalata, ma trimannu, pirchi viu tanti omini dotti, mastri mei e di chiddi chi sunnu saputi. Sunnu cosi bernischi li nostri paroli, jucamu, e nenti autru chi pri jucari acchianu cca supra. Vi pregu non pigghiari la cosa pri lu seriu e pri daveru.

Oi ed ottu ci aggiustai li custuri a Pitagura, a la repubblica di Platuni, ad Aristotili, e poi a li sof tidischi, a lu filosofu di Coenisberg cu la so' Dialettica Trascendintali — Poi mi la pigghiai cu li giuristi e li politici — e ci desi dui scoppoli a Obbis, a Russò, a Pietru Leroux e ad autri sapientuni. Poi passai a li Economisti, e cca dalla chi dalla, e quantu!

Ora a cu pigghiu, a cu afferru pri dimustrari megghiu lu miu argumentu? C'è robba assai — ma



ju strinciu quantu pozzu. Chi vuliti li pazzli di l'ennini sunnu tanti e po' tanti, chi sempri nun restu cuntentu di chiddu chi dicu!

Ci fu cu dissi 'ntra l' antichi, chi l' animali hannu l' usu di la ragioni; ju pri mia la negu puru all' omu, e l'aju dimustratu.

Ju nun vidu beni chiddu chi tanti auturi, *maestri di color che sanno*, hannu voluto diri di li diffrenzi 'ntra l' omu e l' animali. Vaja finitila! l' omu è n' ar-malazzu, comu tutti l' autri, e vi lu mustru cu tanti beddi auturi sani e chini di vita, e puru cu tanti argumenti mei.

Si guardati l' omu di la parti di la menti, chi ci viditi chi vi pozza fari diri: chi iddu è quarchi cosa di chiui di li bestii?

Pri mia nenti. Iddu è veru chi tanti autri dissiru *mirabilia*, mari e munti, nautra picca dicianu chi l'omu fussi Diu, si nun lu dissiru — ma chiacchiari, fantasf, 'llusioni, autri pazzii, autri provi chi ad iddu nun ci cumpeti la ragiuui.

Si vantanu li casi e li palazziuntuusi, chi avi fattu l' omu, nun s' hannu a scurdari li casiceddi di li castori, li cupigghiuni di l' apuzzi, e li nidi di l' aceddi; li quali opiri di l' animaluzzi sunnu accussi beddi, fatti cu tanta maistria e talentu, chi hannu fattu la dilizia e lu stupuri di tutti l' omini, accuminzannu di Salamuni, Teufrastu, Virgiliu... 'nzina a nui. E si iddi nun miggghiarano l' opiri soi, chistu succedi, o pirchi pri saggizza e pri moderazioni si cuntentanu di fari quantu ci basta pri li so veri bisogni, o pirchi hannu tanta abilità o granni 'ngegnu chi senza stentu e cu

na rara perizia fannu l'opiri soi perfetti di primu acchittu — quannu l'omu avi tantu a stintari, sbagghiannu, e poi rifacennu e curreggennu, e sempri ristannu scuntentu 'ntra l'animu so', chi è na pignata, chi sempri vugghi, e nun coci nenti, ma si distruggi idda stissa.

Si iddi nun hannu fattu strumenti e machini ed autri stigghi di casa, chistu è effettu di la perfezioni di l'animali, chi nun avennu bisognu di na cosa, non la fa. Accussì iddi sunnu un termomitrù, un baromitrù, un sismografu, sapennu prima assai di l'omu chi avi a chioviri, e lu caudu, e lu friddu, e l'umidu, e la tempesta, e li terremoti, e ndi avvertinu l'omu di sta so scienza, cu li muzzicuni, cu li gridi e li fracassi ed autri signi.

Misuranu lu tempu e conuseinu li stagiuni, comu lu gaddu, li rinnineddi, li quagghi ed autri aceddi di passa.

Nun è veru chi nun cuncianu mai li so' opirazioni, chi sunnu in perfetta stasi, giacchè quannu la natura ci è cuntraria, fannu cu prudenza all'opportunità li giusti e saggi cunciamenti. Accussì lu struzzu, 'ntra li paisi caudi assai, pri fari scuvàri l'ova, opira di na manera, mentri 'ntra li chiu timpirati di nautra. Li quagghi chi pasanu 'ntra li nostri paisi a lu tempu di la primavera, nun si movinu mai di li diserti di l'Africa, nun sulu 'ntra dda stagiuni, ma quannu spira lu ventu sud-est — accussi fannu tanti autri aceddi d'acqua, pri passari di na spiaggia a nautra, appruftannu di la rema, si fannu strascinari di l'acqui.

Fannu puru di l'ammassi, hannu capitali — comu li castori, li furmiculi chi si sannu fari tanti beddi magaseni sutta la terra. *Vade ad formicam, o piger, et*

*considera vias ejus et disce sapientiam.* E si iddi cogghinu furmentu chiu di lu bisognu, s' intra lu 'uvernu restanu assidirati, non è curpa so, ma di la stagiuni. E poi nun ci sunnu 'ntra l' omini l' avari, ch' ammassanu pri tanti anni immenzi ricchizzi, e sucanu la sarda e morinu di misciaciu?

Quantu cosi hannu apprisu l' omini di l' animali?

Vi lu dici la cicogna cu lu so' becca longa, chi insegnò a l' omu a farisi li cristeri. — l' api e li furmiculi a sapiri beni guvernari cu li so ordinati associazioni e beddi governi — li tarantuli a fari la tila — li castori cu li casi a due o tri appartati ci dettiru lu mudellu di l' abitazioni — ti quatrupidi ci insegnaru a natari — lu Nautillu l' arti di navigari, di maniarli li rimi, di riciviri l' urtu di li venti.

Ah di quantu cosi non sunnu capaci li animaluzzi li chiu picciriddi!

Vi lu dici la tarantula di Pellisson, e chidda di Pellicu — chi di l' autu di la prigiuni a lu sonu di lu bicchieri, chi tuccavanu ohiddi cun firruzzu, scinnianu supra lu filu di la so' tila, ed andavanu a pusarisi supra li vrazza di ddi 'llustri prigiuneri, e poi si accustavanu a la so' vacca, ci la basciavanu, e ci sucavanu la saliva.

Cu l' occhju sottili di la sapienza tanti cosi granni si vidinu 'ntra l' animaluzzi — ma bisogna studiari e jttari sangu supra li libbri e supra l' animali stissi, sapennuli intirrogari, chi iddi a cu li sapi intirrogari ci rispunninu. Rispunni la natura bruta a li fisici, e nun vuliti chi rispundissi chidda animata a nui?

Vi vogghiu ora diri li beddi risposti chi hannu avutu tanti granni auturi — Sintitili pri piaciri.

Erasmu Darwin ci dici chi l'animali, comu li cani, fanuu cuntratti 'ntra d'iddi, e cu l'omu puru — iddi li bistioli hannu l'idei boddi e netti di la giustizia e di l'onestà — Sulu ci junci sta clausula, chi li cuntratti chi fanuu li bestii cu nui, sunnu comu chiddi chi fanuu dui ommini di linguaggiu diversu, chi nun s' intendunu.

Li cavaddi 'ntra nui, dici lu stissu auturi, mustranu pocu signi d'aviri comuni regulamenti — ma 'ntra la Tartaria e la Siberia, undi sunnu cacciati di li tartiri, fanuu na sorti di società, mettinu nun sulu li sintinelli ed hannu capi chi li dirigginu e li sullicitanu a curriri, o andari cca e dda — Puru l'apuzzi hannu un regulamentu chi nui nun cunuscemu, è veru, ma chi existi — Hannu nsumma l'animali na specii d'amministrazioni, chi nun è certu chidda di l'omu, ma l'annu si nun autru in germi — pri quantu ad iddi ci basta — senza cummettiri ddi erruri chi pocu onuranu la nostra specii.

E Gioja accunsenti, e si firma ut supra!

Vindi dicu nautra.

Si dicinu tanti cosi di lu putiri tradiziunali di l'omu, comu patrimoniu esclusivu di la so specii, e chi forma un granni titulu di la so grannizza!

Nenti, nun ci criditi, 'ntra l'armaluzzi c'è puru la tradizioni di generazioni in generazioni, comu l'osservaru lu Sig. Adanson, lu nostru M. Gioja 'ntra li gaddini d'India, 'ntra li cunigghia nostrali e 'ntra chiddi di l'Isula di Sor vicinu a lu Senegal, e fanuu trasiri puru a Linneu pri testimoniu (1).

(1) Vedi Gioja, *Ideologia*; Tom. 1, Par. 1; pag. 17 18.

E lu Sig. Dupont de Nemours, facennu profunni meditazioni supra lu cantu di li Corvi, canusciu chi iddi hannu na lingua so cu diversi desincenzi, quantunqui a nui ndi pari uniformi e monotona. Stu linguaggiu di li Corvi è cumpostu di 25 paroli, vicini l'una cu l'autra, ma nun li stissi, e senza confundirisi (1).

Ndi vuliti sapiri nautra, chi sarà comu la bumma?

Si Darwin avia manifestatu chi l'animali si diletanu puru di fari cuntratti, senza l'incommudu di li nutari e lu pisu di li tassi, ed autri cosi chiaju dittu, e Gioja l'appoggia, e quantu, 'Ntoni Coste, lu tradutturi francisi di Lock, dici, chi iddi sentunu virgogna e pintimentu, Adanson ci dugna lu putiri tradizionali e Dupont de Nemours la lingua a li Corvi — Pliniu dici a littri di scatula chi l'Elefanti hannu ideï di Religioni, sunnu riligiosi, ma senza aviri chiesi, altari o parrini.

Ch'ingegnu profunnu di st'auturi, chi hannu accussi beni saputu leiri 'ntra l'animali, la giustizia, l'onistà, la tradizioni, lu pintimentu, la virgogna, la riligioni!

Jeu nun vi lu dicia chi quannu si sannu intirrugari, si vidi chiaru e beddu chiddu chi sfui a l'autri, e si vidi comu quattru e quattru fannu centusissantaquattru?

Ju vi parru cu l'esperienza 'ntra li manu, e num pozzu sbagghiari.

Ritiniti comu certu chi tuttu sannu fari l'animali, e cu chiu ordini e mudirazioni di l'omu. Si quarchi cosa nun la fannu, chistu succedi o pirci non vonnu,

(1) *Quelques Mémoires sur différentes sùjets, la plus part d'histoire naturelle, e de phisique générale et particulière*. 2.<sup>e</sup> édition in 8.<sup>o</sup>, Paris 1813, 228.

o pìrchi la gnuranza di l' omu nun ci la sapi cumuni-  
cari e risvegliari 'nta li so' spiriti, nun dieu brutali,  
angelici. A li provi a manu a manu. Nui vittimu lu  
cani *Fidu* chi liggia, scrivia, facia l'abbacu e jueva  
a li carti cu lu so' patrni lu signuri Farina, cu stupuri  
di tutti, e pri virgogna di chiddi chi nun sannu leggiri  
e scriviri 'nta di nui, chi assummanu almenu in Italia  
a 17 milioni. Fu tantu lu fracassu e lu stupuri chi  
facia lu sapienti *Fidu*, undi andava e dava prova accussì  
bedda di la so' sapienza, chi quarchi Viscuvu 'nta li  
Calabrij lu pruiviva, e lu fici cacciari, comu opira 'ndi-  
monciata e poju.

Era beddu e purtintusu vidiri *Fidu*, quannu avia  
a scriviri na parola cu dappia cunsunanti — andava  
'nta l' alfabetu pigghiava la prima cunzunanti, poi  
turnava e nun vidennu la secunda, bajava, si dispirava,  
facennu chiaru a conusciri chi cindi vulia nautra — si  
mittia dda cunzunanti a nautru locu di l'abbizzè, e iddu  
cu raru accurgimentu e cu l'alligrizza, chi è figghia di  
li scuverta di lu veru, la pigghiava, e cumpunia la parola.

E cca num finiu l' opira di lu mastro di *Fidu*, lu  
signuri Farina Italianu, giacchè lu raru 'ngegnu di iddu  
riniseiu a sapiri svegliari la sapienza di autri dui cani,  
pri nomu unu *Monitu*, l' autru *Biancu*. — Di *Monitu*  
nun vi parru, pìrchi vin scrittu chi facia a Parigi *des*  
*choses incroyables* — ju eriu chi appi a dari quarchi  
lezioni a la Sorbona, o puru 'nta lu Culleggiu di Luigi  
il Grande!

O cani sapienti, o sapienza di li cani!

*Fidu* cumpunia tutti li paroli di la lingua italiana,  
chi ci vinianu addittati, e traducia cinquanta paroli in

sei lingul, cioè francisa, italiana, latina, 'ngrisa, alimanna e greca.

Lu sapienti *Fidu* facia l'addizioni, la suttrazioni, la multiplicazioni e la divisioni accussì beni e cu tanta sullicitudini, quantu lu chiu esercitatu 'ntra la scienza di li calculi.

*Fidu* e *Biancu* jucavanu a li carti 'ntra iddi e cu qualunque pirsuna, comu li megghiu jucaturi.

Iddi cupiavanu tutti li scritti chi ci vinissiru pri-sintati.

Cunuscianu tutti l'oggetti, tutti li cosi, tutti li culuri, tutti li sciuri, lu valuri di li muniti... ,..

Si pruvau a jucari cu *Fidu* tanti bravi jucaturi francisi, e foru abbattuti, puru un giovani cullegiali, chi avia beni studiatu 'ntra lu libru di li quaranta fogghi!

Quanti dumandi ci fioiru, a tuttu rispusiru!

Un dottu naturalista ci dumandau l'epuca di lu regnu di Franciscu Primu, e chidda di lu regnu di Ericu Quartu e ci 'nzirtau tutti li dui epuchi.

O cani sapienti, o sapienza di li cani!

Nun vi maravigghiati di chiddu chi dicu, chi è virità lampanti.

Ddi cani nun facianu chiddu chiaju ditte pri signali di lu patruni, chi non ndi facia affattu — mancu l'armali lu guardavanu, chi di raru.

Dunca? Ndi veni chiddu chiaju dittu, l'animali o nun vonnu fari na cosa, o l'omini 'gnuranti nun ci sannu fari nasciri la voluntà di fari — Iddi hannu la sapienza in putenza, ma videndusi chiusi 'ntra ddu corpu pilusu e laidu si siddianu, si pigghianu di malincunia, e nun

dannu provi di la so granni intelligenza, e hannu sulu quantu ci basta pri li so' stritti bisogni.

Quannu 'mpirò hannu simpatia pri quarchi omu, chi si l'avi saputu affizzionari cu li boni trattamenti e cu li boni maneri, allura li cani fanun vidiri la grannizza so quantu è purtintusa.

Ndi vuliti quarchi autra prova?

Nun vi ricordu li cani di lu munti San Binnardu, nè di chiddu chi vitti lu Fisico Signor Aragu 'ntra n' albergu, quattru legghi luntanu di Montpellier, chi è rifiritu di Monzù Dureau de Lamalle..... nenti di chistu e d'autru, ma chiddu chi vitti lu Filosofo di Lipsia, e Leibniziu.

E chi vitti? Vitti pressu Zeitz 'ntra la Mismia un cani di pasturi chi parrava — Un giovani alimannu si avia tantu saputu affizzionari ad iddu ddu cani, chi chistu rispunnennu all'amuri cu n'autru amuri ci pronunciaa na trentina di paroli beddi e chiari, quantu chiu si pozza immaginari.

E rifittiti chi avia tri anni lu cani quannu parrau — giacchi, ju criu, chi si lu stuzzicavanu di picciriddu, e la bestiedda si ci mittia pri daveru, arrimiscia un poliglotta di putirsila fari a paru o sparù cu lu celibri cardinali Mezzofanti.

Oh, lu megghiu mi scurdava!

Va l'omo tantu superbo pri la musica! Ebbene quannu li cani vonnu, sunnu puru musici! comu fici vidiri lu dutturi Bennati, abili 'ntra la musica, cu na so barbetta; iddu, a la prisenza di la so sculara, passannu supra sette campani diatonichi n' archiceddu faciacci vibrari di



li soni, e la so canicedda in novi jorna di lezioni cantò la Solfa. Ne ccà finiu la sapienza musicali di la barbetta, chi arrivau ad eseguir di li terzetti e accompagnari correttissimamenti lu cantu di lu so patruni, chi avia una di li vuci chiu estesi chi si cunuscissiru (1).

Nè na vota sula si hannu vidutu cani musici — M. Guerry fa testimoniu puru di chiddu chi facia un cani spagnolu — lu quali portava tantu amuri e rispettu a la so patruna, chi quannu la dama vulia iddu cantava na sorti di solfa cromatica.

Ora vaju cumprinnennu pirohì l'animali sunnu stati tantu onorati. Pirohì li poeti l'hannu misu 'ntra li favuli — cumprennu pirohì l'antichi, chiù sapienti di nui, cunsultavanu lu volu di l'aceddi, o li vudedda di l'animali... o si iddi manciavanu o nun manciavanu chi era bonu o malaggurio... o pirohì quannu niscennu di casa e vidianu na baddottula, sindi turnavanu a la casa cumprinnennu la disgrazia chi l'avìa a cogghiri — O si ralligravanu quannu certi aceddi aliavanu supra la testa di li so figghi... Li principi e li repubblichi 'ntra li so banneri ci hannu misu a stampa quarchi animali, comu aculi, cu na testa, cu dai, niri, bianchi, o liuni, e puru 'ntra li decorazioni — hanno 'ntra stu modu volutu fari n'omaggiu a l'eccellenza di li bestii. Pri chistu mutivu l'antichi sapientuni incheru lu celu di animali, comu s'avissiru volutu significari la so' origini cilesti. Cumprennu pirohì l'Evangelisti hannu macari li so animali — pirohì 'ntra l'Indii c'eranu spitali pri l'ani-

(1) Dureau de Lamalle, *Memoire sur le développement des facultés intellectuelles des animaux sauvages et domestiques*. Lu al' Institut, le 2 mai 1850. *Ann. des Sciences Naturelles*, t. XXII, 1851.

mali Ora cumprennu pìrchì la sapienza 'ntra ddi populi Orientali si facia significari cu lu sirpenti, e 'ntra li greci cu la cucca!

E, accchianannu chiu autu, arrivu a cumprenniri tanti cosi, chi si leino 'ntra li sacri carti.

Comu quannu si dici di essiri *prudenti comu li sirpenti, e simprici comu li palummi* (1). Pìrchì nun si curò lu divinu Auturi, pri lu disideriu di cunvertiri a li piccaturi, di prisintarisi iddu stissu sutta l'immagini di *na gaddinedda* (2) — La bedda parabula di lu pasturi e di li picuredi (3). Ddi beddi paroli di San Petru, quannu parra di chiddi chi abbannunano la liggi di Cristu, li paraguna a li cani, a li porci e peju (4).

Quannu Isaja si paragona a la rinninedda o alla palumma (5) — Beni cumprennu pìrchì la salmista si cunfrunta a lu Pillicanu (6), e a lu passareddu supra li tetti (7), — ed autri sublimi massimi arrivu a pirciari cu la mia povira menti, chi si ammiranu 'ntra li Salmi, 'ntra Gerimia, Isaia, Giobbi, 'ntra li Proverbj.

Puru chiddu chi chiui vi surprennirà, comu a mia mi fa diri chi nun jocu, ma parru cu lu sangu all'occhi, sunnu sti paroli di li Proverbj chi vi vogghiu tutti diri in italianu.

Quattro cose delle più piccole sono sulla terra, e queste superano in sapienza i sapienti: Le formiche,

(1) S. Matteo X, 16.

(2) S. Matteo XXIII. 37. S. Luca XIII. 34.

(3) S. Giovanni X. 1. 2. 3. 4. 5.)

(4) II S. Pietro II, 22. Prov. XXVI 11.

(5) XXXVIII. 14.

(6) Sal. CI, 7.

(7) Ibid. 8.

popolo debolissimo, il quale al tempo della messe si prepara il suo vitto: I conigli, razza paurosa, la quale pianta il suo covile nei massi: Le cavallette non hanno re, e si muovono tutte divise in isquadroni: Lo stelione, che si regge sulle sue mani, e abita nelle case dei re (1).

## 11.

Oh quantu ndi vurria diri di l' animali!

Quannu li Pittagorici dicianu dda metempsicosi, chi oggi tanti si mettinu a buffiniari, eccettu ddi titischi chi vonnu lu circulu 'ntra la vita mundiali, li pitagorici sbagghiavanu pirchl' facianu passari l' anima di l' omini tra li corpi di l' animali, mentre è all' oppostu, quannu Diu castiga l' animali, li fa passari 'ntra li corpi di l' omini.

E na bedda prova di chiddu chi dicu s' avi in chiddu, chiaju dittu, ma puru 'ntra chiddu chi vaju a dirivi.

E' prova di fattu, chi sempri l' omini hanno quarcuna di li qualità di li bestii, d'undi derivaru.

Ci sunnu omini cani, omini sceocchi, omini vurpi, omini lupi, omini ticri, omini liuni, omini tarpi, omini scimii — 'nsumma ci sunnu ntra l' omini li signi evidenti di l' origini umana, chi si cunfunni cu chidda brutali — Quannu l' uomini s' imbestialiscinu veru veru renninu n'omaggio a l' eccellenza di li bestii. Puru S. Paulu cunfessa chi sintia ntra iddu stissu la liggi di l' animali. E nun era na ritagghiedda di sta liggi stessa di l' animali chidda, chi sintia in iddu stissu ddu beddu

(1) Prov. XXX, 24, 25, 26, 27, 28.

santu di Carru Borromeu, chi la maliditta natura l' a-  
viria purtatu sempri a ranfuliari?

Almenu a Borromeu ci bastau la forza di la rili-  
gioni a frinarilu di dda brutta tendenza — ma pri user-  
ti tali e quali non v' è religioni chi tegna, nè cannuni  
chi ponnu alluntanarili di fari *santu Raffacil*! E chiddu  
chi è peju, chiù ndi robbanu, chiù non si sazianu, e sem-  
pri li divora la fami dill' oro pejo di prima.

Viditi quantu la sbagghiaru Ferecidi e Pereira e tutti  
poi li Cartisiani, chi calunniaru tantu l' animali 'nzinu  
a diri chi sunnu automi, chi nun sentunu, nun cumpren-  
nunu, nun desideranu, forse sunnu na picca chiu sutta di  
la nolimitangeri e di la pigghia muschi.

Erano accussì foddì ddi omini, chi lu stissu Cola  
Malebranche nun si fici scrupulu di tirari ddu ranni  
cauci a la cani grvida di dda 'micu so, sulu pirci dda  
povira bestia, chi di tantu tempu nun lu vidia, ci anda-  
va di sutta e ci sbattia la cuda tra l' anchì!

Lu poviru patruni mandau un gridu di dulari! ma  
ddu filosofuni friddu friddu, senza scumponirisi, ci rispu-  
si:

Mi maravigghiu di vui, chi nun sapiti chi li bestii  
nun sentunu, nun annu sentutu mai, e nun sentirannu mai  
'nzinu a chi lu munnu sarà munnu!

Oh pazzii di l' omini quannu finiriti?

Ju parrannu d' animali nun cridu ricurdari l' angulu  
faciali di Camper, e mancu chiddu occipitali di Dauben-  
ton, quantunqui iddi si sirveru puru di lu studiu pro-  
funnu di l' animali, e nun rinisceru a dimostrari chi l' omu  
di la parti di lu ciriveddu è quarchi cosa di chiui di  
tutti l' animali — Nè divu parrari d' autri normi mate-  
riali, comu la massa assoluta ciribrali, nè di lu pisu di lu

ciriveddu in proporzioni di chiddu di lu corpu, tutti cosi, cu chiu menu, ranciti, e chi nun pottiru nenti mostrari, cumprisu lu stissu numiru di li fogghiceddi di lu cirvillettu, chi cu tanta pacenza cuntau Malacarni, e fici lu gran omo castagnetta. Nè ajù a parrari di lu numiru e grannizza di li circonvoluzioni ciribrali.

Chiddi chi parinu a mia dotti ricerchi sunnu chiddi chi ficiru li signuri Porta e Lavater, e poi Gall — cu la differenza chi chistu esaminava l'internu ciribrali e lu craniu, e chiddi l'esternu di l'omu, paragonandulu cu chiddu di l'animali. Porta e Lavater, si nun m'ingannu, mostraru la vera grannizza di li bestii, pirchè vittiru la sumigghianza 'ntra nasu, occhi, manu, frunti, varvarottu... di l'omu cu chiddi di l'animali bruti — comu poi lu dutturi Gall vitti 'ntra l'internu di l'omu, cioè tra lu ciriveddu e cirividduzzu, dda sumigghianza di li so 27 organi, chi poi Spruzzeim assummò megghiu, e rinisceru 35, cu chiddi di l'animali.

E chistu chiaru mostra chi si l'omu è quarchi oosa di la parti di lu corpu, iddu lu è pirchè avi lu pregio d'aviri dda parti, chi hannu li bestii.

Dunca avia ragioni jeu chi dicia, chi ci sunnu omini gattumamuni, omini cani, omini asini, omini vulpi, omini tigri, omini liuni, e accussì annannu discurrennu — grazzi a ddi omini summi chi ajù citatu nun si po' chiù dubitari di chistu.

Pirciò dieinu 'nsoccu vonno ddi dotti naturalisti, chi l'omini tutti pari pari li vonnu figghi di li signi, giacchè pri mia ci sunnu omini figghi di li signi, omini figghi di li sceechi, di li cani, di li boi, di li vulpi, di li lupi, di li tigri, di li becchi, di li camilonti, e di liuni e puru di li porci — pri mia stannu a li argomenti e a li

fatti custatati, l'omini sunnu figghi di tutti l'animali, e comu si dici pri muttu di un bastardu, di na picca a l'unu.

Ju nun pozzu e nun divu viniri a disputa cu la famosa teoria di l'onorevoli Signor Darwin di la trasformazioni di la specii, pinseri chi nun è so; ma fu di Lamarck, Herbert, Grant e tanti autri, e chi si nun sbagghiu, puru Lametrie andau decramandu cu la so' profunna scienza, chi lu purtò a fari lu buffuni a lu re Fidiricu e a cri-pari di ddu modu chi videmmu, chi li omini nascinu di li bestii 'ntra sta manera.

L'animali facennu purcarii 'ntra iddi, ndi vinni a la fini e nasciu lu beddu mostu chiamatu omu.

Mancu aiu a viniri a sciarra cu lu sig. Lyell cu la so' antichità di l'omu, chi macari susteni dda teoria, chi avi puru 'ntra la Svizzera li so' sequaci; e 'ntra la nostra bedda Italia li signuri Mollescott, Schiff, De Filippi.....

A tutti chisti ju ci mandu e ci assiu di supra tanti autri dotti naturalisti — comu p. esempiu D' Archiac e Flourens chi fici a posta un beddu libru contra l'idei chi Darwin manifesta 'ntra la so opira *De l'origine des especes*, dicennu e ripitennu che Darwin tra la so Opira di tuttu parra e chiacchiaria, fora chi di l'origini di li specii.

Ci putria puru, e ci li divu mettiri avanti Godron, Quatre-fages, Malebranche, Fee, Ewdards.... e li nostri italiani Stoppani e Biancone — Liggitili, si puru nun l'aviti studiatu, e vidiriti chi iddi nun dicramanu, nun fannu gratuiti esserzioni, ma ragiunanu e dimustranu cu li fatti a li manu.

È beddu a vidiri lu celibri scienziatu Biancone, nostru Italianu, fari cundannari lu Daruanismu dalla stissa osteologia cumparata 'ntra l'omo e li bruti!

Putria parrari di na famosa donna, Clarenza Royer, chi puru difendi a spada tratta li pinseri di Darwin, e fa tutti li sforzi pri propagari per urbem et orbem lu Daruinaismu — ma chi vuliti di fimmini littricuti e scienziati, senza pregiudiziu di sta dotta signura, ndiaju na coppula china.

Jen l'ammiru, pircchè onura lu so sessu! Ma sempri sunnu fimmini, e finiscinu cu cosi di fimmini.

Mi ricordu di la Blomer chi giriau lu munnu anticu e chiddu novu, vistuta d'omu 'nsemmula a so maritu, pri fari riabilitari la donna. Chi ottinu e ricavau di li so viaggi? Chi li signuri ristarù sempri fimmini, o megghiu, menzi uomini e menzi fimmini.

Pircchè lu cappiduzzu all'ominina silu misuru, lu jppani puru; ma la faudedda? Ah chistu no, dissiru tutti li fimmini a coru!

Ma la Blomer gridava, comu na disperata, dicennu: pezzi di scecchi ristiriti danca ermofroditi?

Vui mi diriti, guadagnaru li fimmini aduttannu lu cappiduzzu all'ominina e la giacchittedda? Chi sacciu jèu? Sulu vi dicu chi cca, nun c'è chi diri, ci fu e c'è na vera trasformazioni, non di specii, ma di sessu, quantunqui non tuttu, ma menzu, lu restu appressu, secundu la liggi di la continuità chi regna nun sulu 'nta li cosi naturali, ma 'nta la società macari.

E raggiunnu di fimmini chi sunnu l'onuri di lu so sessu, vogghiu ricurdari la Signura Marchisa Florenzi, chi è digna di la vostra attenzioni. Idda ha traduttu beddi operi di Filosofia tidisca, e s'ha inpeguatu di propagari l'Egelianismu 'nta la nostra Italia — e pari

chi avissi n'ngègnu virili filosoficu — e ognunu la loda, pirci onura lu beddu sessu.

E puru vi dicu na cosa, chi nun la cridiriti. Idda, sta dotta signura, finisci cu mustarisi fimmina: giacchè 'nta l'ultimu libru so ou lu titulu *Immortalità dell'anima*, titulu chi è tantu giustu, quantu chiddu d'Elvezio *L'esprit*, pri cui Voltaire andava dicennu: lu libru di Elvezio supra lu sp'ritu senza sp'ritu — dunca ju dicu la Florenzi 'nta stu libru supra l'Immortalità di l'anima, senza Immortalità di l'anima, da vera Ammazzunni ci dugna cu la mazza d'Erculi un granni corpu a Fuerbach, e 'nzinu a cca lu corpu fu d'omu; ma idda non s'avvitti, chi ammazzannu a lu nemicu, lu corpu ribbunnu tantu, chi s'ammazzau idda stissa; e cca fu fimmina.

Nsunna li fimmini sempre sunnu fimmini: *Di conzi cinni menti na bisazza, Falla comu voi sempri è cucuzza*, e portanu lu piccatu di Adamu.

E la parola Adamu mi svigghia nautra vota la Signura Clarenza Royer e lu Darnanismu.

Chindi avia a fari ddu guardianu di pecuri di Mosè di scriviri dda Genisi e ficcarici ad Adamu di linu! L'omu di fangu veramenti nun si lu pottiru agghiuttiri, ed era na purcheria, pirciò si voli figghiu di la signa.

Iddu è la nobiltà di sintiri, chi porta ddi valurusi ommini a ricunusciri megghiu pri proto-parenti la scimia, e no lu fangu.

È iautili chi lu miu illustri amicu lu Cav. Garbi-glietti dicissi, chi nun hannu pututu li paliantologi scu-priri l'aneddu paleozologicu 'nta l'omo e li scimii, comu attestanu li celebri Pruner Bey e la Professuri



Bianconi (1), li Daruinisti sunnu surdi, e lu veru surdu è chiddu chi nun voli sentiri.

Nui ora ridemu, ligennu ddi attacchi chi ci ficiru a la Scrittura, sirvennusi di la chiu antica e di la chiu moderna 'ntra li scienzi — forsi chiddi chi vinirannu, ridirannu a la varva di tanti nostri bavorni ! .

## 12.

La pazzia di l'omu nun avi limiti, chiu ci penzu, chiu mi convinciu di sta granni virità!

Oh chi minchiunaria chi dissi!

Iddu voli andari avanti, voli progrediri!

E sapiti chi cosa è lu progressu?

È na cosa bedda assai... è... chi è? ju nun vi lu sacciu diri. Forsi pirchl nun mi bastanu li forzi? Guirnò. Forsi pirchl è na cosicedda simplici, simplici, comu l'acqua di li maccarruni? Guirnò. Ma pirchl dunca?

Pirchl avissi a chiacchiariari tantu, chi vi sturdiria la testa chiu di chiddu chiaju fattu sinora.

Ma vui ndi vuliti pri forza sapiri quarchi cosa — na parola e fuju.

Progressu voli diri andari avanti; ma comu andari avanti si ci sunnu muntagni e rocchi chiantati di tanti secoli!

Dunca prima condizioni di progrediri e chidda di schiantari e distruggiri 'nziuu a l'urtimu tutti li ostaculi.

(1) Intorno all'opuscolo del Dottor Giuseppe Bernardo Davis. *Sul cranio umano subfossile di Neanderthal*. Relazione del Cav. Dottor Garbiglietti letta nell'adunanza del 16 Dicembre 1861, della Reale Accademia di Medicina di Torino pag. 25.

Quali sunnu ddi cosi chi ostaatulanu pri andari avanti,  
e pri lu megghiu?

Chiddi chi sunnu chiu vecchi, chiù antichi.

Dunca guerra all' anticu, a lu vecchiumi e rancidumi.

Tuttu chistu è logicu, non è veru?

Ma viditi comu scinni sula, idda pri idda, la con-  
chiusioni.

Lu chiu vecchiu di tutti è Diu, e pirciò si pinci  
'ntra la Chiesa latina cu na varvazza bianca, poi veni  
l'anima, la famigghia, la propietà...

Dunca cacciamuli na vota pri sempri, sindi 'ndassiru  
a diavulu Diu, anima, famigghia e propietà chi s'avi  
'ndari avanti, s'avi a progrediri!

Pirciò viditi, chi ragiuni nd'hannu di cumannari a  
Diu chi s'arritirassi chetu, chetu, chi ndi livassi l'inco-  
mudu, chi 'ndavi datu pri tanti seculi.

E st'autra cosa vecchia di la propietà, antica quantu  
lu munnu, chi puru, comu Diu, avi l'ardiri d'affaccia-  
risi 'ntra tutti li populi nun sulu, ma puru 'ntrà la genti  
sarvaggia, st'autra nanna di tanti mali — di l'egoismu,  
di li liti e sciarri, di li discordii, e chi alimenta ou lu so  
sciatu 'nvilinu ogni manera di peccati e di disparità  
'utra l'omini, oh sunnu fratelli — sindi 'ndassi a dia-  
seacci comu lu ventu!

La propietà 'nsemula a la famigghia sunnu n'autri  
dui cruci di l'umanità, la quali nun po aviri rifriscu si  
non quando si li leva dincoddu.

Cu la famigghia ci va nessa e connessa la propietà,  
la successioni, cose diabolichi, chi lu tempu, l'abitu-  
dini e la tirannia fannu stari 'upedi.

Oh, filici l' omiui quannu 'ndavanu cugghiennu ramu-  
razzi pri li voschi, senza ce' essiri nè to nè me, senza re,  
senza parrini, senza jndici, senza avvocati, senza matri-  
moniu civili ccclesiasticu... e gudianu la paci di l' ancili.

Tutto chistu, già s' intendi, cu lu pirmissu di Masi  
Hobis.

Oh, mi scurdava lu megghiu! E l' anima? idda si  
nd' avi puru andari, e scumpariri di la scena di lu munnu.

Nun pari veru quantu voti à 'statu cacciata sta  
brutta magara di lu munnu, sempri e cu facci di na  
petra di sciara nun senti nenti, sindi torua frisca frisca,  
comu na rosa.

La caccianu di l' Indii, e cumparisci 'ntra la Grecia;  
la caccianu fora a cauci l' Epicureci di la Grecia, e  
e torna bedda, sana e china di vita 'ntra lu Mediu Evu  
— Si junceru finalmente tri seculi, avennu l' artimu  
un battagghiuni di Enciclopidisti, cumannatu di Vol-  
taire cu lu nervu 'ntra li manu, e a via di cauci, di  
boffi, di sputazzati, di sucuzzuni, timpulati, di lignati  
e corpa di nervu e cu la corda 'nturciniata e 'ncatara-  
mata....., e scumparisci l' anima.

Oh, quantu cindi foru, chi allura cantaru vittoria,  
dicennu pressu a pocu sti paroli:

Ombre, fantasmi, deità sognate,  
Perchè non han di sennò ombra o barlume,  
Di un filosofo al cor voi non regnate.  
Moro senza temere un finto nume,  
Senza soccorso d'un bugiardo frate,  
Senz'ara, senza incenzo, senza lume.

Cu lu cridiria, chi doppu sta sullenni cacciata, chi  
nautra vota s'affacciassi viva viva e fistanti 'ntra lu  
nostru seculu!

Chi fari! pacienza cu li persuni molesti!

Ma ci sumu li chiu caudi, chi sucaru lu latti di lu senza — e da capu all'anima dalla cu dalla, ad idda ad idda!

Mi ricordu d'un Medicu francisi, celebri pirchl tutti li malatii vidia nasciri di lu stomacu e di li budedda, e li curava cu sancisuchi a tuttu pastu; stu dottu omu pri farila andari a manu a manu, senza tanti cirimonj, japriu e sciaccau cuntinara di crozzi di morti, chiui forsi di quanti ndi avia apertu Gall pri la so Craniologia, ebbi la filici prova, firriannu tutti li pirtusa e li caseddi e casidduzzi di lu ciriveddu, di nun avirla viduta, e cunchiusi: si l'anima nun si vidi, dunca l'anima nun c'è.

E doppu tuttu chistu, cacciata cu li furcini, comu dici Oraziu, idda sindi torna catammari catammari.

Chi nun ci hannu dittu pri farila andari! chi è ventu, aria, focu, nenti, e chiu sutta di lu nenti... finalmente ci dissiru nautra cosa.... e sapiti chi ci dissiru?

Ci dissiru chi lu fosforu è idda stissa, o chi lu fosforu è na granni cosa, è chiddu chi 'nta lu ciriveddu fa chi esistissi 'nta l'omu un gradu autu e sublimi d'intelligenza, e cu 'nta l'animali ndi avi chiu o menu, è chiu o menu intilligenti.

Ma chista era fantasia, e li stissi senzi megghiu 'nterrugati da li valenti professuri Sgarzi e Borsarelli dettiru un risultatu chiaru, comu la luci di lu sulì: o chi lu fosforu nun havi alcuna 'nfluenza pri lu gradu di l'ntelligenza, o chi tutti l'animali hannu lu stissu gradu intellettuali.

E sapiti comu s'arrivò a sta bedda e lucida conchiusioni?

Cu l'analisi chimica fatta supra ciriveddi d' omni di diversi razzi e d' animali, offrennu di li tavuli chi fannu vidiri li risultati di la diversa quantità di fosforu chi cuntenu li diversi ciriveddi (1).

Ju nun vogghiu viniri a lichiti e dissi cu lu Signur Maleschott — nun mi sentu sta valia — iddu è logicu, comu Broussais e tutti li sinsisti, 'ntra li so pinseri — Ma la logica sula, sulidda, nun basta! Giacchì postu chi tuttu veni di li senzi, e chi l'umana 'ntelligenza è tutta senzi, e nenti antru chi senzi, è loico di circari l' anima, e vulirila tucari cu li manu, e vidirila cu l'occhi ajutati di lenti microscopica la chiu pirfetta, chi l'arti può dari, ed è logicu puru comu dici lu stissu auturi di *La Circulation de la Vie: chi lu ciriveddu nun è un menzu di cu l' anima si servi pri pinzari, ma chi 'ntra lu senzu chiù ripurusu di la parola, iddu è l' organu di lu pinzeri, chi l' attività intelletuali è na manifestazioni dinamica indissolubilmenti ligata a un sustratu materiali* (2).

Ma iddu è veru, chi tuttu lu pinzeri umanu è chiusu, strittu è 'ncatinatu 'ntra li senzi, comu un carceratu 'ntrà li gradi di la prigiuni, o un ferru 'ntra la morsa di lu firraru? Nuddu lu potti sinora dimustrari (3). — e lu stissu Malescott lu dimustra accussì evidenti, comu quattru e quattru fannu centu quarantaquattru (Deuxième lettre pag. 9).

Si iddu mustrau na gran forza pri acchianari quarchi vota supra di Liebig, e vitti chiddu chi ci sfuiu a stu

(1) Il Cervello di un Negro della Ghinea del Dottore G. Bernardo Davis — *Relazione* letta nella seduta dell'11, Dicembre 1868, della R. Accademia di Medicina di Torino dal Socio Dottor Cav. Antonio Garbiglietti. pag. 6. 7.

(2) *La Circulation de la vie*. Tom. 2.<sup>o</sup> Dix — Utieme lettre pag. 149.

(3) Vedi i miei Opuscoli Editi ed inediti Vol. I, II, IV.

summu omu — ma nun ci abbastaru li forzi pri acchiari 'ncoddu di Kant, e nun potti vidiri chiddu chi chistu vitti.

Lassamu a Maleschott e cumpagni chi circassiru l'anima cu li senzi, comu si cercanu li attuppateddi, e quannu la vidirannu e la tucchirannu, ndi darannu lu beddu avvisu a sonu di brogni e cu la fanfarra, basta 'mpirò chi nun pigghiassiru lu sceecu pri mastru Attaviu!

Comu a mia pari chi ci successi avant' eri a M.<sup>e</sup> Donders cu li soi dui sfrumenti, li quali servinu a misurari li cilerità relative di li percezioni e chidda di lu pinseri.

Oh, li granni progressi chi s'anno fatto 'nta la Psicologia cu la potenza di li fisici!

Si iddi oggi misurano la cilerità di lu pinseri, appressu ndi darannu lu pisu, la grannizza e lu culuri di l'anima pinsanti stissa!

Cu tuttu lu *Nôématochographe* e lu *Nôématochomètre*,aju l'onuri di diri a M.<sup>e</sup> Donders chi mi cunsolu assai, annamu avanti comu lu curdaru!!!

### 13.

Quannu mi mettu a leggiri accussi pri spassu, quar-chi libriceddu, e viu scrittu chi stu seculu è lu seculu di li vapuri e di li telegrifi elettrici, e chi sacciu ju! mi pari chi si sbagghia in generi, in numeru e casu la formula vera di l'induli e geniu di stu tempu.

Pri miu sentimentu la formula di lu spiritu di lu nostru seculu è chista — Seculu *Divoraturi*! Attenti a li provi.

Cu li vapuri e li telegrifi elettrici ha divoratu lu tempu e lu spaziu — cu li facili ad acu a retrucarica e cannuni di nova 'nvenzioni ha divuratu l'omini — cu li rivoluzioni ha divoratu li dinastii e li regni — cu li corpi di statu ha divoratu li repubblichi — cu lu Dagherrotipu e la Fotografia ha divoratu la luci e certi arti — ... 'ndi vuliti chiu provi? 'ntra quarchi naziunali Congressu si ha la *bedd'* arti di divorari a chiu nun pozzu li capacità e nutabilità, e tuttu lu jornu si studia lu modu comu aghiuttirisindi quarchi autra. E 'nzinu a cca è divoraturi in attu — è divoraturi 'n potenza chi tenta di mettere in attu, ma nun ci ha potutu rinesciri giustu giustu di manciarisi Diu, l'anima, la famigghia, la proprietà.

Oi si divoranu li miliuni, comu ogghiu pitrolu! E pirciò fu saggizza fari scumpariri l'argentu e l'oru, e darici in canciu carta. Almenu cu divora la carta, nun mancia lu mitallu, chi nun po' digiriri. Chista fu na saggia providenza e providenza!

## 14.

Sognu juntu quasi alla fini di la mia cicalata — nau-tri dui paroli pri la nostra Italia, e finiremu sta storia dulurusa.

Tutti li temi chiaju trattatu meritirianu na longa diciria, ma chistu di la bedda nostra patria chi fu lu suspiru di Danti, Macchiavelli e tanti summi omni chi sapiti, e chi fu addivata e crisciuta cu li lacrimi, li turturi e lu sangu binidittu di li martiri, meritiria pri

idda sula un discursu chiu longu di la misiricordia di Diu.

Lassamu la Finanza, l'Internu e l'Esteri, la Guerra... lassamu l'Istruzioni pubblica e lu beddu codici civili, dignu monumentu di la sapienza italiana... Lassamu tuttu chi c'è cosi ch'abbrucianu, e tuccamu di tre omini chi sunnu signu di tanti dicerii e di calunnii, di tre omini chi la fami canina si vurria manciari e divurari tutti sani sani.

Ju nun sacciu si 'nsocca dici lu prufeta Mazzini avrà locu oi, dumani, nautru misi, 'ntrà nautru annu, o a gghiri dda nautru seculu... mi dichiaru nun aviri lu donu di la prufizia!

È sta mia simplici confessioni, nun fa tortu a lu miu poviru talentu, pinzandu chi quannu lu nostru La Farina si prisintau di notti, ammucciuni, ammucciuni a lu Conti di Cavour pri l'affari di la Società Naziunali, lu Conti Benzu, chi era ddu granni politicuni chi sapemu, puru ci dissi a lu nostru insigni Pippinu, chi iddu nun sapia si l'Italia si facissi 'ntra nautru misi, o n' annu, o vintanni.. Dunca pri mia dieu; a li postiri l'ardua sentenza — iddi risolvirannu e vidirannu di l'idea Mazziniana!

Ju nun sacciu nimmenu si 'ntra li pinseri di Mazzini cindè di chiddi chi fannu sciauru o fetu di sucialismu — Nenti sacciu e vogghiu sapiri di sti cosi — ma sacciu chi tutti fummu so sculari cu la so' *Giovini Italia* e l'*Apostulatu popolari* — e pri dirla chiu chiara, tutti bivemmu a ddu so fonti, tutti respirammu l'aria Mazziniana chi era allura la sula aria criduta respirabili.

Sacciu chi iddu sulu pinzau all'Unità d'Italia 'ntra ddi tempi, chi paria un sonnu d'infirmu, e si sfurzau



cu li scritti, cu li paroli e cu li fatti a prupagarla per *urbem et orbem*. Sacciu puru tuttu chiddu chi avi fattu, e pensa sempri di fari ddi so' noliti.....

Sacciu.... e quantu ndi sacciu!!!

Ma nun è giustizia, nun è ragiuni fari comu l' asinu, chi doppu d'aviri bivutu 'nta lu sicchiu, si vota e ci dugna na paricchia di cauci.

Pigghiamu lu beni d' undi veni; semu giusti cu tutti, puru cu lu diavulu! Nun nigamu li pregi di na cosa sulu pirciè avi puru difetti — lu difettu nun havi amucciari lu pregiu, nè chistu si avi a fari serviri pri distruggiri lu difettu.

Avanti, finemula!

Eppuru, quantu c' 'ndè chi vurrianu fari sosizzeddi di Peppi Mazzini?

D' iddu sulu! E di Peppi Garibaldi?

Tuttu si scurdaru! e Marsala e Calatafimi, e Palermu e Milazzu e.... e tutti l' 'mprisi eroici di lu Capitani di lu populu!

Nun ci bastò pri saziari l' animu crudili di ddi tali dda nfamuna padda d' Aspramunti!

Si iddu nun avi na granni menti, avi in cumpenzu un cori granni assai!

Qnannu Jeu penzu chi l' Eroi di Caprera andau a Londra, pirciè ci fu chiamatu; li granni preparativi; li festi di lu populu 'Ngrisi pri la vinuta di Garibaldi — chi un postu pri vidirilu si pagava cintinara di liri... e chi tuttu chistu finiu peju chi a cuda di surci, o megghiu comu la scena di Don Basiliu 'nta lu Varveri di Sivigghia, mi cunfermu 'nta lu miu propositu, chi l' omu nun avi l' usu di la ragiuni.

E quantu nun c' indi dicinu puru e udi 'nfastocchianu pri Vittoriu Emanuele, nostru Re?

Tutti li guai chi hannu, tuttu chiddu chi patiscinu, tuttu l'imputanu a Vittoriu!

A lu Parlamentu, a lu Cunsigghiu Provinciali, a chiddu Cumunali.... mai ci penzanu, mai ci dicinu nenti, comu si non esistissiru!

Addivati e crisciuti sutta l'assolutismu, undi ogni beni vinia di lu re, ogni mali d' iddu puru — chi la vita di lu populu, sippuru allura avia vita, vinia pri motu miccanicu, chi scinnia di l'autu a lu vasciu, nun cum-prenninu, chi la cosa oggi procedi diversamenti.

Dunca nun hannu l'usu di la ragiuni.

Un Re chi fa acchianari la rivoluzioni 'ntra lu tronu, e, quasi saria pri diri, si l'abbrazza — Chi fa supra lu tumulu di so Patri ddu famusu giuramentu, e lu manteni a costu di tuttu, anchi spargennu lu sangu soi e chiddu di li so beddi figghi, comu lu surdato lu chiu valurusu — Chi nun vota facci a tutti li periculi, chi nun si scanta di nenti.... è un Re democraticu 'ntra lu veru senza di la parola.

Nun po' apprizzarilu beni, nun po' ammirari li so virtù, cu nun avi studiatu l'educazioni chi si dugna a li principi reali. Iddi avvezzi a lu *sic volo, sic jubeo*.... Eppure lu nostru Vittoriu, sunnu gia vintanni, e mai si è mustratu nun essiri ddu Re, chi regna e nun governa.

Si poi lu diavulu chi s' 'mmisca 'ntra tutti li cosi di stu 'nfami munnu, ha fattu pigghiari lu capu stornu a chiu d' unu di ddi liberaluni, di cu è la culpa?

Quannu 'acchiananu ddi scanni ministeriali omini sapienti, chi hannu strascinato un cantaru di magghi di ca-

tina a li pedi pri tanti anni 'ntra li galeri, o hannu fattu la muffa 'ntra li sottirranii, o limosinatu pri lu munnu — e sti ferri chi hannu ammutatu, sta muffa chi hannu cugghiutu junti junti, e sta fanni chi hannu supportatu.... tuttu è statu pri 'causa di la libertà..... quannu sti tali stannu a lu Putiri, di cu è la curpa, si l'affari vannu mali?

O raggiuni, raggiuni, beddu raggiu divinu, pirchi t' 'mmucoiasti, unni si mai 'ntanata? Quali furettu ti po fari nesciri a lu chianu?

'Ntra li filosofi nun ti trovu — 'ntra li pulitici nun ti viju — firriannu l'econumisti mancu 'ntra iddi cindò na lagrima di la to' essenza — di li naturalisti facisti sciaoffu — di li populi spiristi.

Duncaaju eju raggiuni dicennu, chi l'omu nun avi l'usu di la raggiuni?

A sta dumanna rispunniremu nautra vota, mustrannu: *chi lu sulu omu avi l'usu di la raggiuni.*

FINI.

